

75
1918

საქართველოს
1918-1919 წლები

საქართველო

საქართველოს
მედიკალი



1918



მუხრანის

№ VII & VIII 1918წ.

სომხური და დიპლომატი.



ქართული ენციკლოპედია

ნაკადული

საგარეო საქმეთა

საგარეო საქმეთა

ქართული

წელიწადი 89-XIV.

№№ 7-8.

1918 წ.

29.12.18 F-585



მწერალი გ. კვიციანი.



შინაარსი

I—ძნელი გაკვეთილი,—სურათი	1
II—ლოცვა,—ლექსი ა. შკვადლიაშვილისა	3
III—ზოგი კირი მარგებელია,—ტყეატისა	4
IV—ნიაფი ფიქვ-ნაძენარში,—ლექსი, სახარუღაძისა	9
V—მოგონებანი —ქალაქში,—გაბრაუდ გოგუაძისა	10
VI—ლომის ჩივილი,—ლექსი,—ელიაზიშვილისა	23
VII—ტროადის ომი,—პიესა ერთმოქმედებად ვადმოკეთებულ შეღავთა კანდელაკის მიერ	25
XIII—ბულბულთ ხელმწიფის ასული,—ხალხური ზღაპარი გალექსილი (შემდეგი) დავ. კასრადისა	34
IX—უცნაური ყმაწვილი,—კენტისა თარგმანი ნანო ნინაძისა	45
X—გიორგი მათეშვილი—ილია ნაკაშიძისა	52
XI—თამარ მეფის დრო, (დასასრული)—ა. ანთაძისა	55
XII—გასართობი: —შარადები	63
XIII—რედაქციისაგან	64



ლოცვა.

ლმერთო, მიცოცხლე სამშობლო,
ტემუდარები გულითა,
მიცოცხლე სახელოვანი
თავისი წმინდა რჯულითა.
იმან მაწოვა ძუძუ მე,
მადლიანი და რძიანი,
იმან გამრია სოფელში
უჩინარი და გვიანი...
ლმერთო, მიცოცხლე სამშობლო,
იესოსავით მტრიანი,
ბევრჯელ ჯვარცმული მტერთაგან,
ბევრჯელაც აღდგომიანი.

ი. მჭედლიშვილი.





ზოგი ჭირი მარგებელია.

ღაბოლაგებულ ურემზე გოგოები საღამო ეამზე ახლად მოფრენილ შოშიებივით ერთად შეხუნზლულიყვნენ და ისეთი ჯიჯინი გაჰქონდათ, რომ მთელ უბანს აყრუებდნენ. ურმის გვერდით მთასავით აკოკოლაგებულ ქვების ხროვას ქეთო ზედ წვერზე მოჰქცეოდა და მთვარის ამოსვლას იქედან ელოდა. შორი ახლო, საბძლის გვერდით ზვინად დამდგარ ნაგავს ცეცხლი ეკიდა და ჩუმად იხრჩოლებოდა. როცა ნიაფი წამოუბერავდა, ნაგავი უცებ გაჰყვტილ ცეცხლის თვალს ქეთოს უზამდა და ამავე დროს მისკენ გაქანებული ბოლიც გარშემო ისე ეხვეოდა, რომ დაუწყწარებელი ქეთო იმ ბინდ-ბუნდში უცებ შენათებულ ცეცხლის შუქზე ლეჩაქით მოსილ მოჩვენებას წააგავდა.

ბავშვებს მთვარის შუქზე უყვარდათ ლხინის გაჩაღება და სანამ მთვარე ამოვიდოდა ურემზე თავმოყრილნი ათასი ამბით ერთმანეთს გულს ურთობდნენ.

— არიქა, გოგოებო! ამოდის, ნათღება, დახე, დახე, რა დიდია, რა ლამაზია, — წამოიძახა ქვებზე მდგომმა ქეთომ და გაშუქებულ მთვარეს ტკბილი ღიმილით და გაბრწყინებულ სახით შეეგება.

— შენ, ეი, ნუცა! გასწი ის ოხრად დასარჩენი ხოკერა დროით გამოიტანე, აქამდინ ვერ გაახურეთ, თქვე უბედურებო! ანაღვლე! დილით მაგდანა იმ ხოკერათი ნაგავსა ჰყრის და საღამოთი კი იმაზე დაკრულ ლჷკურზე მე მაკუნტრუშებენ... ეი! თეთრად თქვენი სარეცხი! რა იყო, რა დაგე-მართად, ეგრე ძლიერ რა გაკისკისებთ? — წამოუტია ახლა ურემზე მსხდომ გოგოებს, რომელთაც ამ წამს რაღაზედაც

ეოხუნჯათ და სიცილ-ხარხარის დროს ახლად ნაყარ ფუტკარივით ისე დაუწყენარებლივ მოძრაობდნენ, რომ ურემს სულ ქაქა-ქუქი გაუღიოდა.

— შენ ეი, ქინკა, ის რა გიქნია, კიბორჩხალისათვის რა საქმე დაგიწევია?! — შესძახეს ქეთოს ერთხმად გოგოებმა და უარესად ახმაურდნენ.

— რა მიქნია, რას ლაპარაკობთ?! განგებ ვაიტრიზავთ ქეთომ, ვითომ არაფერიაო, და ძირს ჩამოსული შიგ შუა გოგოების ხროვაში შეიქრა.

— როგორ იყო, კიბორჩხალას, ბარძაყიდან სისხლი როგორ დაადინე?!.

— ჰოო... მაგაზე კვდებით სიცილით?!. ღმერთმანი ჩემი ბრალი არ არის, თამრომ, აი, თამრომ ხომ კარგად იცის — მოჰყვა ქეთო, როცა ქავლზე კარგად მოეწყო.

— ისე იყო, ის შეჩვენებული ჩვენი კლასის დამრიგებელი, მართლაც ნამდვილი კიბორჩხალა, ჩემზე გადმოკიდებული, რომ სულის დგმა აღარ იყო, მიჰირებდა საქმეს; აღარ ვიცოდი, რა უნდა მექნა; რაც უნდა კარგი შეფიქრა და გამეკეთებინა, იმას სულ თვალში ეკლად ედებოდა, ოიშე! ვინც ეს კლასის დამრიგებლობა მოიგონა, ჩემი ცოდო ეღოს. მერე ის ოხერი, სწორედ ჩემ გვერდით კედელთან დაიდგამდა სკამს, რომ ახლოდან უფრო სული კარგად შეეხუთა. გაკვეთილების დროს, თუ ჩემთვის დაფიქრებული როდისმე ჰქვიანად ვიჯექი, ის გაბრაზებული დათვივით მუდამ ჩუმათ შემომბუტბუტებდა — ყური უგდებ, ინდაურივით ნუ გაშტერდიო. თუ ჩემებურად კაი გუნებაზე ვიყავ, და ვაი ჩემი ბრალი, მუჯლუგუნებით მქონდა გვერდი გამონგრეული. აღარ ვიცოდი რა მექნა, გვერდიდან როგორ მომეშორებინა, რომ მუდმივ ჯოჯოხეთისთვის თავი როგორმე დამეღწია. ბოლოს რომ ველარ გაუძელ, ავდექი და მეც ხერხს მივმართე. ერთხელ პირველ გაკვეთილს შემდეგ ისე ძლიერ გამაჯავრა, ამხანა-

გებთან ისე ძლიერ დამწყვიტა გული, რომ ვერ წამოიშორებოდა ვინა მეორე ვაკვეთილზე იმისი ახლო ჯდომა როგორ უნდა მომენელებინა. მეორე ვაკვეთილად გეოგრაფია უნდა გვეკონოდა და იმ საგნის მასწავლებელს, ბატონ გიორგის, ეს ჩვენი კიბორჩხალა ცოტა არ იყოს რაღასაც ეპრანქებოდა. ავდექი და შეც ამით ვადუხადე. გვერდიდან რომ მომეშორებინა იცით რა მოვიგონე? ნევისი შუაზე გადაუტეხე და წვერიანი ნახევარი სკამზე ისე დავამაგრე, რომ თვალით არა სჩანდა. მე კი წიგნი გადაეშალე და მასწავლებელი რომ შემოვიდა, ისე დინჯათ დავჯექი, თითქოს ჩემზე ჭკვიანი იქ არავინ არ იყო. ამ დროს კარებიც გაიღო და ჩვენი კიბორჩხალა, ფეხაკრებით როგორც მწყერი, მასწავლებელს წინ ისე გაუგოგმანდა. ჯერ ერთი თვალით ყველას ამაყად გადმოგვხედა, შემდეგ სკამზე რომ ცივად დაეშვა, უცებ ისეთი ხმაურობით წამოვიარდა, რომ მთელ კლასს თვალეზი დაქუცტილი დარჩა. შეგირდებმა ფხუკუნი მორთეს, მასწავლებელმა, ვითომ ვერა ვაიგორა, მორცხვად თავი ჩაღუნა და ის კი, ის ჩვენი კიბორჩხალა... ჰო, ჰო, ჰო! ჰო! რა მოუვიდა. ისე გაბრაზდა და ისე გაწითლდა, როგორც კარგი ქარხალი. თანაც უიშისოდაც დაღრეჯილი სახე, ისე ძლიერ დაეღრია, რომ სწორედ იალბუზის ტარტაროზს დაემზავსა. გაგინახიან, მაშინ კი იკადრა კარებისაკენ მოცოცხვა, მაგრამ ვაკვეთილის შემდეგ მთელ კლასს და განსაკუთრებით კი მე რაც დღე დამაყენა, ღმერთმა ისეთი წყალობა ნურც თქვენ მოგაკლოთ. იმ დღიდან ძველი ხურჯინივით უარესად ჩამომეკიდა ბატონო და სისხლი გამიშრო, სისხლი!..

მაგრამ იცით, რა ვითხრათ, ღმერთმა უშველოს, წრეულს ჩემი მეორე კლასში გადაცოცხვაც სწორეთ რომ ვითხრათ იმის ბრალია. ხომ გაგიგონიათ, ერთი კირი მარგებელიაო, მეც სწორედ წრეულს იმისი შარი ხეირად მექცა.

თამრო, ხომ ვახსოვს, ანგარიშის მასწავლებელი ძლიერ ავად რომ ვაგვიხდა, ვახსოვს, ხმაც რომ დაუყარეს მოკვდაო,



ჰო და იმ დღეს ეს ქალბატონი ისეთი გაბრაზებულნი შემოვიდა, რომ რა სთქვას კაცმა, სიმართლე რომ მოგახსენო, ჩვენი კლასი მუდამ გადარეულებით იყო სავსე და განა როდისმე მოიშლიდნენ ხმაურობასა და დავიდარბას. ჩვენ იმ დღესაც ჩვეულებრივ ზოჯის აბანო გვქონდა გამართული და შემოვიდა თუ არა ეს ქალბატონი, ერთი ისეთი დაგვტყვივლა, რომ როგორც მწყურები ყველა ისე გავინაბენით.

— არც კი გრცხვენიათ, ქალბატონი ნინო თურმე ძლიერ შეწუხებულია, და თქვენ კი ასეთი ამბავი გაქვთო. — დაათავა მან და მეტი მღელღარებით თვალზე ცრემლიც კი მოერია. — ძლიერ შეწუხებულიაო, გაიგონეს თუ არა, კლასი უცებ სამარესავით გაჩუმდა. ცოტა ხნის შემდეგ ამ სიჩუმეში რაღაც სლოკინივით მომესმა და რომ გავიხედე — დავინახე რომ ზოგიერთ ჩვენ მატაოცებს წრიპინი მოერთოთ, ზოგს თვალები დაქუცტილი და პირი დაღებული დარჩენოდათ, ზოგი კი ისე სასაცილოდ იღრიჯებოდა, რომ ტირილის მაგივრად მე კინალამ სიცილი წამსკდა. მაგრამ აქეთ-იქით კიდევ რომ გავიხედე და ჩვენ კიბორჩხალას უცებ მოკრიალებულ თვალებს რომ შევეფეთე — კინალამ გული გამისკდა; ისეთი დაბლვერილი, ისეთი ბოროტი თვალებით მიცქეროდა რომ ჰა, შიშით სული გამეპარა. შევხედე თუ არა შეშინებულმა უწინ ის გავიფიქრე, არიქა მეც უნდა ვიტროო, თორემ ჩემი საქმე ცუდათ არის შეთქი, რადგან იმ შემთხვევას ხელზე დაიხვევდა და თავად უგულო ხეს მეძახდა და მერე ხომ უფრო საქმეს გამიქირებდა. ახლა რაღა ვქნა, უნდა ვიტროო, მაგრამ ეს ოხერი რომ არ მეტირებოდა! ბარემ ხან ერთს შევხედავ, ხან მეორეს, მინდა რომ იმათმა საწყალმა გამომეტყველებამ მეც ამბატროს. ხან ბარძაყზე მწარედ ვიჩქმეტავ, მაგრამ გამიწყრა ღმერთი და ერთი ცრემლიც ვერ მოვიგვარე. ბოლოს მკვდრები მოვიშველიე და უეცრად ჩემი პატარა ძმა კუბოთი და მას გვერდით სიმწარისგან დაკვლანჯული დედაჩემი თვალ წინ ნათლად რომ დავიხატე — მოვრ-

თე, ბატონო, ღრიალი და ვილა იყო ჩემი გამჩუმებელი. ახლა რომ მომეხვივნენ და დამიყვავეს—ტირილმა უფრო ისე ამიყოლია, რომ უცებ თავ-ბრუ დამეხვია, თვალთ დამიბნელდა და ჰერი ვიდი, გულიც თურმე წამსვლია. ღმერთმა უშველოს იმ გულის წასვლას, როცა მასწავლებელი კარგად გახდა და უამბეს, თქვენი შიშივე ავადმყოფობის გაგებით ქეთოს გული წაუვიდაო—ის იმ დღიდან ისე ყურადღებით მექცეოდა, ისე მშველოდა, ცალკე მასწავლიდა და ბარემ ძლიერ ხელს მიწყობდა, მაგრამ ხომ მოგეხსენებათ ბატის ამბავი, მე მაინც ვერა გავიგვრა და ის ოხერი ანგარიში ახლაც ქირივით მეჯავრება. მაინც პირობით გადამაცოცა, ზაფხულში იმეცადინეო, მაგრამ აი, ხომ ხედავთ ურწყავებში რა გულიანად ვმეცადინეობ. ღმერთმა უშველოს იმ ჩვენ კიბორჩხალასაც, იმისი ამოჩემება ასე კეთილად კი მექცა, სამაგიეროთ იცით გოგოებო, რა გითხრათ, იმ ჩემსავე ნაჩქმეტ წვივებზე ორი კვირა სულ ერბო და კარაქი ვისევი, რომ ლურჯათ დაჩითული ხორცები დამშუშოდა... მაგრამ დაიცათ, აგერ დაირაე მოდის! თვალი იმათაც დაუდგებათ... აი დამინახეთ, სოფლად, ანგარიშის სწავლა როგორ უნდა... ტაში ქალო!..

დაირის ხმაზე ურმიდან უცებ წამოხტა ქეთო, წამოშლილი გოგოებიც ერთ წამს კრიალოსანივით გარშემო დაკრიალებულ კარ-მიდამოზე შემოიმწკრივა გაშალა ხელი და მთვარის შუქზე როგორც ბზრიალა ისე კოხტად დატრიალდა. ქეთოს თან ამხანაგვით თავისივე ჩრდილი გიჟურად აჰყვა და მასავით დაუწყნარებლად წინ და უკან ცქრიალს მოჰყვა.

ცქვიტი.





ნიაფი ფიქვ-ნაძენარში.



გაზაფხულის დილა არის,
დაჰქრის ცელქი ნიაფ-ქარი,
მთების მკერდზე დარაზმული
თრთის, ტორტმანობს ფიქვ-ნაძენარი...

ტყე შრიალებს, ტყე შიშინებს,
ლურჯ მკერდს არხევს, აბიბინებს,
წარმტაცად ეღერს ფოთოლთ ქნარი...
ვიშ, მუსიკა ისმის წყნარი!..
ნიაფი ჰქრის... ფიქვ-ნაძენარი
აირხევა, დაირხევა,
ლურჯი კაბა მოქნილ ტანზე
აქეთ-იქეთ მოეხვევა,
ხან ფიქვები დაღლილ რხევით
ნაძვებისკენ გადინებდა
და ტოტები ტოტებს კრძალვით
ჩაეწნება, გაეყრება...
ღელავს ლურჯი ფიქვ-ნაძენარი,
ხან ჯგუფ-ჯგუფად აზვირთდება,
ტყის შრიალის საამო ხმა
აქეთ-იქეთ მთებს აწყდება,
და მოივლის არე-მარეს,
ყრუ ხევ-ხუეებს გააფხიზლებს,
ნიაფ-ქარი ფრთებით ამტვრევს
კლდით გადმომსკდარ კამკამა წყლებს.
ბოლოს ბრძოლით, მუდამ ქროლით
დაიღლებს ნიაფ-ქარი,
დაღლილ ტოტებს ძირს დაუშვებს
და ისვენებს ფიქვ-ნაძენარი.

ი. სიხარულიძე.





№ 11
1917

მოგონებანი^{*)}

ქ ა ლ ა ქ შ ი .

II

მე ულ მომთბარი და დამშვიდებული ხომ მაინც არ ვიყავი და სკოლამ პირველ დღეებიდანვე სულ შემადგულა ქალაქი.

რა იმედებით მიმბარა მამამ აქ, როგორი წარმოდგენა მქონდა აქაურ ცხოვრებაზე და რას ვხედავდი სინამდვილეში! როცა სასწავლო ოთახის კარებს მივადგებოდი, მაგონდებოდა ბნელი, ნესტიანი ხრამი, სადაც მზე ვერ აწვდენს სხივებს, და შავ კლდეებს ხავსი მოჰკიდია. მწყემსობაში ხშირად მიხდებოდა ხოლმე ასეთ ხრამებში გავლა და ყოველთვის მაყრუოლებდა, სუნთქვა მეხუთებოდა და ვჩქარობდი მალე გამოვსულიყავ მზეზე.

ახლაც ისე იყო, მაგრამ მზეზე გამოსვლას ვინღა იფიქრებდა... ან კი სად იყო მზე!

— განა შევსძლებ ამდენი წელი გავატარო აქ? — ვეკითხებოდი თავის თავს, თითქო საპრობილეში ვიყავი ჩასმული.

სხვა ბავშვები შეჩვეოდნენ ყველაფერს და თავდავიწყებით თამაშობდნენ დასვენების დროს. გაკვეთილებზე კი დადვრემილი მიდიოდნენ, ძლივს მიათრევდნენ ფხებებს, თითქო ბეგარა ჰქონოდათ მოსახადი.

— აქ უნდა დაეწინაურდე და გავბედნიერდე?

იხ. „ნაკადული“ — თებერვალი 1917 წ.

დაღონებული ვმორდებოდა ბევშვებს, მივეყრდნობოდი ღობეს და გულ-ამომჯდარი შევეყურებდი საყვარელ მთებს.

რა მშვენიერად ამოუხატავს ბუნების ხელს ეს მთები, ლაყვარდი ცის ტილოზე—საუცხოვო ხაზებით დაუსერავს დიდებულ მხატვარს ძვირფასი ტილო და არ დაუზოგავს ფერადობაც, რომ ცის მნათობთაც კი შეაყვაროს დედამიწის მშვენიერება. და მართლაც მზეს და მთვარეს ეს მთები აურჩევიათ გზად: ამოსვლისას, იმათი მწვერვალებიდან მიესალმებიან ხოლმე ქვეყანას. ცისკრის ვარსკვლავიც ჩასვლისას აქ შეჩერდება, თამაშობს და იცინის კეკლუცი და დილის სიოს საღამოს აბარებს ყანაში მიმავალ მუშასთან. უგზო-უკვლოდ მოხეტიალე დაქანცულ ღრუბლებსაც უყვართ ამ მთებზე დასვენება: საღამოს, როცა მზე ჩადის, უშიშრად წვებიან ხოლმე მწვერვალებზე, ზანტად იკლაკნებიან და ემზგავსებიან ათას გვარ საშიშარ მხეცებს... მაგრამ ჩამავალი მზე ისე არ დაუძლურებულა, რომ უხვად ვერ მიაყაროს სხივები...

და აჰა—ცეცხლის აღში გახვეულან არეული ღრუბლები, და ასე გეგონებათ—ოქროს გვირგვინით მოკაზმულან მთები და ემზადებიან მთვარის შესახვედრად.

შევპყურებ ამ მთებს და მავიწყდება მარტოობა.

და აგერ კიდევ ჩემს წინ, სკოლის ეზოში, მიჰქრის პატარა მდინარე, იმ მთების შვილი, ნაძვნართ კრემლით ანაფსები, ჩუხჩუხა და ანცი,—მიჰქრის და ბუტბუტებს, თითქო ესაყვედურება თავის ბედს, რომ უწმინდურ ქალაქში არგუნა გავლა, ებრძვის ქვებს და ცოტა იქით,—იმედით, რომ ადრე მიატოვებს ქალაქს და თავისუფლად გაინაფარდებს მინდვრებსა და ყანებში,—მშვიდდება, წყნარად ჩუხჩუხებს, ეალერსება ნაპირად აღმოცენებულ ბალახს და მოუთხრობს მთის ზღაპრებს.

—ნეტავი მეც შემეძლოს შენთან წამოსვლა, ჩემო ცელქო!—ვოცნებობ და დავიწყებას მივეცი სინამდვილე.

— Пошли въ классъ. скоты, пошли, пошли мутрукъ паршивый!— ამ სიტყვებით ერთი აღმზრდელი მიერ ეკება ბავშვებს გაკვეთილზე, და მეც გონს მოვდივარ.

სადღა იყო „დიდ-კაცური“ ცხოვრება,—ვის შეეძლო გაკვეთილების შემდეგ,—როგორც წარმოვიდგენდი—თავმომწონედ ჩამოვლა ქალაქის მოედანზე და ბინაზე მოგვიანებით „მოპაკურება“. სხვა მიზეზიც რომ არ იყოს განა შეიძლება ქალაქის მოედანზე გავლა, როცა ეს წყევული საწიგნე-ქეჩხო აქაც მაქვს ზურგზე მოკიდებული? სხვა თუ არა, ქული და ქაშარი ხომ ახალი მქონდა, მაგრამ ძველ ქეჩხოსთან ამათაც დაეკარგათ სილამაზე—სხვისი მინც უკეთესად მეჩვენებოდა. ასე წარმოვიდგინეთ, მიხვრა-მოხვრას და სიმარდესაც მაკლებდა სამარცხვინო ქეჩხო: ქუჩაში ხშირად წავიკრავდი ხოლმე ფეხს, დავეცემოდი და ჩემი ქეჩხოც ბრაზვანს აღენდა მტვერში.

— მადლობა ღმერთს, რომ მარო არ ხედავს მინც,—გაეფიქრებდი, როცა დიდი და პატარა დამცინოდა, და ათასწაირი შენიშვნა მესმოდა ქეჩხოზე.

— მგელმა რატომ არ დააძღა იმ თხას, რომელმაც შენ გატარა!— კბილების კრაქუნით ვეუბნებოდი გამტვერიანებულ ქეჩხოს.

კარგად მორთულიც რომ ვყოფილიყავი, მინც სად მქონდა სეირნობის დრო: სადილის მზადება ჩემი მოვალეობა იყო და სასწავლებლიდან პირდაპირ სახლში უნდა გამოვქცეულიყავი. მოქანცულს და მშიერს უნდა გამეჩაღებინა ცეცხლი, გამეხურებინა კეცი...

— სწორედ რომ ბედნიერების ვზაზე დამაყენა მამამ!— დავსცინოდი თავს:— დედის გამოცხოვბილი მკადი თუ ენანებოდა ჩემთვის, არ მეგონა და ახლა ხომ დავრწმუნდი ამაში.

გარშემო აუცილებლად ტრიალებდა ტიტველი წიწილი, მახტებოდა ხელში, მართმევდა ცოშს და მხიარულად ქუკქუკებდა. როცა გაძღებოდა, მიადგებოდა ბუხარს, ითბობდა მკერდს და სთვლემდა.

— მუქთა მკამელავ, გარედ ჩქარა!— ვუწყებოდნი, მაგრამ ის ზანტად შემომხედავდა ცალი თვალით და ისევ უშიშრად განაგრძობდა თვლემას.

არწივის სიკვდილის შემდეგ, ის იყო ჩემი გასართობი და ყოველ დღე ერთსა და იმავე დროს დამიხვდებოდა ხოლმე ბინის კარებთან.

— ქაჩლავ, შენია ახლა ბურთი და მოედანი— აღარაფრის გეშინია, — დავსცინოდნი.

მართლაც და ორ ეზოს, დაპატრონებოდა, ცოტა აკლდა ეგნატე-რუსის ეზოშიც გადაცოცებულიყო და ჯერ კი ვერ გაებედა: ალბათ, ჯერ კიდევ ჩამოუხსნელი არწივის გალია აშინებდა. როცა არწივის წივილი ესმოდა, ძლიერს დაძვრებოდა ბალახში და ჩემთან შიშით თუ შამოიპარებოდა ზოგჯერ, ახლა კი იმის მოლოდინში ვიყავი, როდის გადმოათრევდა ეგნატეს ეზოდან არწივის თავს!

სხვა ვითომ არ მეყოფოდა და სადილზე ხშირად საყვედურიც შემხვდებოდა:

— ბიჭო, ფქვილის ღომი წირებხევით*) უნდა იყოს და შენ კი უბრალო ცომი მოგიზელია, — მეტყუადა ხოლმე ამხანაგი. ან ასე:

— ნახშირს ხომ არ სწევადი, რომ დაგიხრუკავს აი მკადი? დღეს მამა-ჩემი გამოივლის სადილად და ნახშირს ხომ ვერ კაშს?

— მამაშენს შავი ქვა, — ძლიერს ვიკავებდი თავს, რომ არ დამეყვირა.

დამეგობრებული აქ არავისთან არ ვიყავი. საერთოდ ქალაქის ხალხი მიუკარებლად მეჩვენა. სად იყვნენ ოქროპირმენავე, ფარნაოზ მეწისქვილე და ტარიელი! სოფელში უცნობებიც კი მეუბნებოდნენ — „გამარჯობა შენი, ბიძიაო“ და

*) თხილის წნელს გრებენ და თოკის მაგივრად ხმარობენ.

აქ ერთი „გამარჯობა“ მაინც გამეგონა! სულ დამამცირა ქალაქმა. თავი არაფრად მეჭევენებოდა.

— ნეტავი სანდრო სლაბოდკელთან ვიყო დაახლოვებული, — ხშირად გავიფიქრებდი ხოლმე: — მაშინ ხომ მომაქცევენ მაინც ყურადღებას.

სანდრო სლაბოდკელი 13—14 წლის ყმაწვილი იქნებოდა, მაგრამ იმას ყველა იცნობდა და ისე ექცეოდნენ, როგორც დიდს. პატარა ტანის, გამხდარი, მაგრამ მეტის-მეტე ცქვიტი და გაბედული — ასეთი იყო სანდრო. მოკაუჭებული ცხვირი და ღრმად ჩამჯდარი, მელანივით შავი და მუდამ ანთებული თვალები არწივის გამომეტყველებას აძლევდა მას. ის მარტოკა ცხოვრობდა ქალაქის ერთ მიყრუებულ ნაწილში — სლაბოდკაში, პატარა მიწურ სახლში. დედა ადრე გარდაცვლილიყო, და მამა ერთი წლის უკან დაეხვრიტათ.

ბევრი რამ მესმოდა სანდროზე. ვინ ამბობდა, — ცხრა წლის იქნებოდა, როცა ბნელ ღამეში ჩაიპარა საპყრობილეს ეზოში, ავიდა ფანჯარაზე და დატუსაღებულ მამას ქლიბი ჩაუვლო ბორკილების გასაჭარადო.

სანდრო ქუჩებში ბებუთებს ჰყიდა და ამით ირჩენდა თავს.

ძალიან მომწონდა იმის დამოუკიდებლობა.

ქალაქს გვერდით მდინარე ჩამოუვლიდა. ამ მდინარეზე გადიოდა ჩვენი სოფლის გზა, მიჰყვებოდა ფართო, დაუსახლებელ ვაკეს და შედიოდა ტყეში. ხშირად დაედიოდი ამ მდინარეზე, ჩამოვჯდებოდი ნაპირას ხის ჩრდილში, გადავათვალიერებდი ვაკეთილებს, მერე ვისროდი წყალში კენკებს და ვიციქირებოდი სოფლისაკენ. ზოგჯერ ნაცნობებიც გამოივლიდნენ გზაზე, უფრო ხშირად კი იმ მოურავს ვხვდავდი, რომელსაც ზურგით ინდაური მივართვი.

ერთხელ აჩენილ ჩრდილში ვილაც მოხუცებული დავინახე გახუნებულ ნაბაღზე წამოწოლილი. ზურგზე ქეჩხო ეკიდა და ჩაფიქრებული დასცქეროდა წყალს.

ვიცანი და გამეხარდა.

— გამარჯობა შენი, ტარიელ!— მივესალმე.

— გაიზარდე, — ძლივს მიპასუხა და მოიხედა: — ოჰო... ჩემს თიკრიკას გაუმარჯოს! მოდი, ბაბუავე, დაისვენე... მგონებოდა — ბუბლიკას (ბლიოს) გიყიდდი და ახლა რაღაი. ხომ სწავლობ, ბაბუავე, კარგად?

— კი ვითომ...

— ვითომ რაა?!. მაი გაპრიალეებული ვარსკვლავი რომ გაქვს ქულზე — მაგას ვითომ ეკადრება? — ეწყინა.

— არა... კარგად ვსწავლობ.

— აბა რა გინდა აქ ტყული?.. მამაშენი თითითაა ჩამოკიდული — იმდენი საქმე აქვს — და იმას მოგებარე, თუ არ ისწავლი.

— ჩვენსაა ხომ დადიხარ, ტარიელ?

— გუშინ გამოვიარე, ბაბუავე გუშინ. კარგად არიან.

— იგი შინ ხომაა... მარო? — გაუბედავით ვკითხე.

— რომელი მარო, თიკრიკავე?

— №-ის მარო რომაა — იგი.

— შინაა აბა სად წავიდოდა... დაბეპელობს ეზოში და არის. მერე? — მკითხა და ღიმილით გადმომხედა.

— არაფერი... ისე ვიკითხე.

— მაგას ქე დავეთხოვოთ, ბაბუავე, და მარაფესტი გამოვილაო, სოფელს მიწა ურიგდებაო — ამის ხომ არ წავიკითხავს რამე ან ვაგიგონია?

— არაფერი.

— კი მითხრეს, მარა განა იქნება რამე? მარაფესტი და მიწა იქნება იგი თუ მთლიათ არ დავეხარჩობენ. აგერ საწყალი ზალიკაი რომ ჩამოიყვანეს დღეს გაბაწრული და ჩაასამარეს ციხეში — ამას გაუბედავდენ, მარაფესტი რომ იყოს? —

ამოოხვრით დაამთავრა ტარიელმა, გადატრიალდა და მზეს, რომელიც ზეწნის ფოთლებში სკრიდა სხივებს და ოქროს ბადეს აბლანდავდა ბალახზე.

— რომელი ზალიკაი, ტარიელ? — ვკითხე.

— ზალიკა ტურამუსაიფაი, არ იცი? ორი წლის საყანური არ გადავიხდიაო, — დააბრალებს. ღმერთი, ხატი — გადავიხადე, ჩემი ურმით ჩავიტანე და მივართვი ქალბატონსო, მარა ვინ დაუჯერა. რაშტიელაის დანაწერი კვიტანციე გვიჩვენე აბაო. ზალიკამ რა იცოდა, თუ ხუთი-ექვსი წლის შემდეგ მოსდებდნენ შარს, და იმ ბარათებით თუთუნს მოუკიდა თურმე, მიყუდა მოურავმა ნალიაზე კიბე — ძალით უნდა წავიღო სიმინდიო. შეიქნა წივილ-კივილი... გამოცვივდნენ უბერანგო ბაღნები. ვინ მოგცა, შენ წუწუკო, ჩემი ოჯახის მოთბრის ნებაო, — იყვირა ზალიკამ და გაპარბალებული წილდი სქეჰკა ლოყაზე... მოურავი აქეთ გადმოტრიალდა და მისი ყური იქით გაგორდა... აგია — დღეს გამომატანეს ამის ლაპორტი. ასე იყო აი ამბავი, ჩემო ბატონო... მოდი ახლა შენ და მარაფესტს ელოდე... მარა იმას მაინც არ დავიჯერებ, რომ საწყალი კაცის დღე არ გათენდეს, — ჩვეულებრივად იმედით გაათავა ტარიელმა, წამოდგა, მოიღო ნაბადი და გაუდგა გზას.

— მშვიდობით, ბაბუავ, მშვიდობით, — მოიხედა და და მიქნია თავი. ვიდექ ჩაფიქრებული და უცქერდი მიმავალს, სანამ ტყეში არ მიიმალა. უფრო მოხუცებულად მეჩვენა ტარიელი: სულ გამხდარიყო, თვალები ჩასცივივნოდა, კუზი აწეულიყო, დაგლეჯილ ქალამნებში ჩაკრული ფეხები ერთმანეთს ეხლართებოდნენ... ეს ცოცხალი განსახიერება თვით გაქირვების და უბედურებისა, „კანონ-ლაპორტი“ ზურგზე, კვლავ განაგრძობდა ხეტიალს და დაჰქონდა მწარე სინამდვილის სამწუხარო ამბავი.

შემაწუხა ზალიკაის თავგადასავალი. არ ვიცოდი რიც მეშველა, იმ საღამოსვე წავედი სანდრო სლაბოდკელთან.



— ახლა რა ვუშველო... ცოტა მოიცა და გადაუხდი— არავის შევარჩენ წვალეხას... გავიზარდო აგერ!— დაშპირდა:— მერე გგონია— ყველა გაბედავს გაქცევას, რომც შეეძლოს? ჰეი-ჰეი! ჩაკედება ძალღივით და ვერ გაბედავს— ბრძანება არ გამოსულაო! აბა, ასეთია კაცი, — დაუმატა და მწარედ ჩაიციხა— ბებუთს მოგყიდი თუ გინდა. უპ, რა ბებუთია, რა ბებუთი...

— არც მინდა და არც ფული მაქვს.

— ან კი რა თქვენი საქმეა. თქვენ იგიც გეყოფათ მთელი დღე გადახონ— „ლობიოს იღებენ კოვზით, ძროხას აქვს რქებიო“ და თავში გიჯაჯგუნონ. ნასწავლები!— ზიზლით ამხედ-დამხედა სანდრომ და დაუწყა ბებუთს ლესვა.

ვერაფერი ვერ მოვიფიქრე საპასუხოდ და უსიტყვოდ მოვშორდი.

თვეში ორჯერ, შაბათ საღამოობით, სახლში დავდიოდი. რა სიამოვნებით ჩამოვივლიდი საყვარელ ადგილებს, დავათვალიერებდი და მივესალმებოდი ცხოველებს!

თავ-მომწონედ უამბობდი დებს ქალაქზე, ვთხზავდი და ვაფერადებდი ჩემს იქაურ ცხოვრებას. გულში კი სოფელს შევინატროდი.

დედაც ხშირად მოდიოდა ქალაქში და მოუთმენლადაც ველოდებოდი ბაზრობა-დღეს: დედა ყოველთვის იზიარებდა ჩემ თავისუფლად გამოთქმულს დარდს, მანუგეშებდა და პურსაც ბლომათ დამიტოვებდა. მაგრამ სიკეთეს სიივეც სდევდა და ზოგჯერ ისე შემარცხვენდა, რომ არც პური მინდოდა და არც რაიმე.

— ნენუკიავ, მოდი ერთი გაატარე აი ბატი ბაზარში— იქნება იყიდოს ვინმემ,— ამ სიტყვებით მომაჩიებდა ხელში ფეხებ-შეკრულს ბატს. ვითომ და განზრახ უსათუოდ ჩემ ხელში დაიწყებდა წყეული ქყვილს და ფართბალს, რომ საერთოდ ყურადღება მოექცია ჩემკენ:

— ერთი შეხედვით—როგორ ვაქრობს ქეჩხოიანნი? ვინ იმ გაყიდვას! დავდიოდი, როგორც გაღვივებულს ნაკვერჩხლებზე და, თუ მკითხავდა ვინმე,—რას ამბობთ... მე თვითონ ვიყიდე-მეთქი, ვეუბნებოდი.

უველაფერი დამამსკირებელი მე რად შემხვდა მაინც? იმაზე უარესი რაღა იქნებოდა, სანაგავე ორმოებში და ყუთებში რომ ვიქექებოდი!

ჩამოვივლიდი ხოლმე ბნელ ღამეში სახარაზო დუქნების წინ და ვეძებდი ნაგავში ტყავის ნაქრებს, რომ დროზე მივშველებოდი დაგლეჯილ წუღებს და ფეხ-ტიტველა არ დაეჩენილიყავი.

უზომოდ შეგძულდი ძაღლებს მათი მეტოქე ნაგავზე და საშინელი ყუფით შამომეხვეოდნენ ხოლმე კეტით შეიარაღებულს. დღეც ცუდი თვალით მიყურებდნენ, თითქო ატყობდნენ, ნაგავის დასათვალიერებლად მიდისო. მხოლოდ ერთი ქეციანი, ცალთვალა ძაღლი დამიშვეგობრდა,—აღბად იმიტომ, რომ იგიც მოძულეებული და დევნილი იყო: მუდამ აგორებდნენ და ღრღნიდნენ საბრალოს. დამინახავდა თუ არა, დაიწყებდა ნახევრად გახდილ კულის ქნევას, თითქო ილიმებოდა და მაგონებდა:

— კინალამ არ დაგგლიჯეს იმ წყეულებმა წუბელ... მეც არ ვებრალები—დაავადებული მათი მოძმეო.

— ასე, კოჩა-მამულიე, ასე,—მიწონებდა მამა ხელობას... აგერ,—ღმერთო, შენით,—გადასახადებს თუ გაეუძელი და მოვიშორე, საკალანდოთ იმისთანა კრიჭინა წუღებს გიყიდი რომე...—მპირდებოდა მამა..

როგორც იყო, ველირსე საშობაოთ დათხოვნას და იმ დღესვე გავეშურე სახლში. გულმაგრად და ამაყად მივდიოდი: კარგი ნიშნები მიმქონდა. განა ხუთი გაკვეთილიც იმიტომ არ გამოვტოვე, რომ ხუთების რიცხვი გამედიდებინა! ვიცოდი, რომ მამა ყველა „პიატებს“ დაითვლიდა და თუ

„ჩეთირე“ შეხედებოდა, ხშირად დიდი საყვედური უნდა მიმელო, თუ არა... ბროწეულის წკეპელი! ან იმას როგორ დავეუშვებდი,—რომელიმე მოწაფეს გაესწრო და მეტი ხუთები ჰქონოდა?

ჰერი, ბიკო! შობა, ახალი წელი, ჩიჩილაკი, თოფების გრიალი, საერთო მხიარულება, ხაქაპურები, ღორის თავი... მაროსაც უსათუოდ დავინახავ სადმე! ავინაზლაურებ, რაც ვეწვალე ამ ოთხ თვეში,—ვარ აღტაცებაში და ვუახლოვდები სოფელს...

ვერც კი შევამჩნიე—ისე დამძვრა ხელიდან ორი კვირა. თაფაქიდული ვიჯექი ბუხართან. მხიარულად გიზგიზებდა ცეცხლი და გაუმადლრად ლოკავდა ბუხრის კედლებს. პატარა ლამპა გამურული შუშით ძლივს ბეჭუტავდა მაგიდაზე და ხრინწიანი ხმით იცინოდა, თითქო უხაროდა ჩემი დაბრუნება. ისევ უნაყოფოდ იზებირებდა ევგენი ბერძნულ გრამატიკას და შეუჩერებლივ ამბობდა:

— ი მახერა პალლაკის ატიკიას ესტინ.

კიდე-ჩამოტეხილი კეცი გამოიყურებოდა კუთხიდან და, ასე გეგონებოდათ, იღიმებოდა წყეული.

გარედ ცივა. მძიმედ დასწოლია დედამიწას ბნელი ღამე. თამაშობენ, ფერხულს უვლიან ცაზე ვარსკვლავები.

დღეს მოვედი სახლიდან. ისევ გაკვეთილები და კეცი! აღარ შემიძლია, არა.

მეორე დღეს, საღამოს, სახლში ვიყავი. გაუკვირდა მამას, როცა განვაცხადე—ხელ უქმეა-მეთქი, მაგრამ მაინც დამიჯერა. მინდოდა მეთქვა, რაც გადაწყვეტილი მქონდა, და ვერ გავბედე,—მხოლოდ გაკვრით გავაგებინე დედას.

მეორე დღეს ატირებული უახლოვდებოდი სუფსას.

— რა დავაშავე, რომ ასე შემიძულეს? აბა ნახონ, თუ არ დავიღუპო,—ვემუქრები.

წარმოვიდგინე, რომ მართლაც დავიღუპე... აგერ მშობლები თავს იკლავენ. ვაიმე, როგორ დავღუპეთ კოჩა-მამუ-

ლიეო, — სტირის მამა. ყოველ შემთხვევაში, მე კი ისეთი და
 ლუპვის მომხრე ვარ, რომ ყველაფერი მესმოდეს — ვინ რას
 ამბობს!

— ეჰე — ე... გეტყობა, გიტყობა ჩინონიკ კაცს, — შემ-
 ნიშნა ოქროპირმა, როცა ნავეში ჩავედი: — ჩვენ უნდა ვტი-
 როდეთ, ყაბახები, თვარა პრისთავს და ნაჩანიკს რა ატირებს?..
 იგი მითხარი — ჩემი და ფარნაოზაის მენდალი ხომ არ გაგა-
 ვიწყდა? — დამიწყო ხუმრობა, მაგრამ კრინტიც ვერ ამომა-
 ლებინა.

არ გასულა სამი დღე, რომ პარასკევს, საღამოს, სახლ-
 ში ვიჯექი და ვთბებოდი ცეცხლთან. დედა ჩაფიქრებული
 იჯდა მეორე მხარეს და ხელები თავზე შამოეკრიფა. პატარა
 დები ხტუნაობდნენ და ამბობდნენ:

— თუ არ უნდა ქალაქში, ქე იყოს აგერ შინ. კია, ნუ
 გეშინია, მსუნაგი თხები სამწყესავი.

დედას გადაქრით განვუცხადე — თავს მოვიკლავ და მე-
 ტი აღარ შემიძლია ქალაქში მოცდა-მეთქი.

— ბიჭო, ეგება უემური შეგზვდა ან გაგთვალა ვინმემ...
 ვაიმე, ვაიმე — ვინა ხარ მაღლიანი — წამქარით თავი, — სწუხ-
 და დედა: — სწავლა და სიკეთე არ მინდაო — ამას გადარეულის
 მეტი ვინ იტყვის!

მაშ დედის აღშფოთება მოვათავე. ახლა მამაზე იყო საქმე.

— მოდი შეგილოცავ, — მიმართა დედამ თავისს საშუა-
 ლებას და გახურებული შანთი უგზავნა თვალში ამას და
 იმას. შემდეგ საცერში გამახედვა, კატას კული შეუტრუსა და
 ცხვირზე მიმადო — წამიფუტა: ამას, მისი აზრით, ვერც უწ-
 მური და ვერც სხვა რამ უწმინდური ძალა ვერ გაუძლებდა.

— რატომ გენანებათ ჩემთვის ერთი ლუკმა გამომცხვარ-
 რი მქადი? — თავდაცვიდან გადავედი შეტევებზე.

— მამაშენს უთხარი მასე, — მომიქრა დედამ.

კატა კუთხეში იჯდა, ილოკავდა კუდს და უკმაყოფი-
 ლოდ შამომხედავდა ზოგჯერ, თითქო მესაყვედურებოდა:

— მე რას მერჩოდით?.. სირცხვილი, თუ ჩემს კულზე ჰკიდია შენი სწავლის საქმეო!

მამაც მოვიდა. სახეზე ეტყობოდა—გაჯავრებული იყო. სიჩუმე ჩამოვარდა. კატამ მიაშურა კნაველით და გაეფხანა ფეხებზე—შესჩივლა კულის თავგადსავალი.

— გამარჯობა შენი, ბიჭო!—მკვებელ მითხრა:—ხვალ უქმეა თუ?

— არა.

— აბა? ფული ხომ არ გკირია?

ჩამივარდა ენა—ველარაფერს ვამბობ. ხრაწა-ხრუწით ვიკნეტ ფრჩხილებს.

მამა მოუჯდა ცეცხლს და გაიხადა ქალამნები.

— რაი და ვერ გავძლებ იქინე—შინ ვიქნებიო,—გასტება დედამ ფონი.

— თუ არ უნდა, საქმე ცოტა მაქვს მე? იყოს და მომეხმაროს,—კარგი ხნის სიჩუმის შემდეგ სთქვა მამამ:—ამას არ სდომებია და აგერ ჩინონიკი-კაცი კიდევ კლასში შევიდა,—მოიგონა უფროსი ძმა, რომელმაც მიატოვა სამსახური და სწავლის გაგრძელებას შეუდგა.

— რა კარგია მამა, რა კარგი,—ვეფქრობ:—როგორ ჰყვარებია მისი კოჩა-მამულიე!

გამოცოცხლდი, გავთამამდი, დავიწყე დებთან ჩუმი მუსაიფი და კისკისი. აწი მე მკითხეთ წყლის ქათმების იმბავი-მეთქი,—ვამბობდი.

მამას წარბები უფრო შეეკმუზვნა და ვახშამს ელოდებოდა, დედა ფილთაქვას არაწკუნებდა და ზოგჯერ ღრმად ამოიოხრებდა.

გამძლარი და დამშვიდებული ჩავგორდი ბუმბულში და იმაზე ვფიქრობდი, სად დამეგო ხვალ მახე.

აგერ ვხედავ—გამბულა ვებერთელა წყლის ქათამი, მაგრამ დახე ეშმაკს: წყეულს ჩემი ღერბიანი ქული ჰხურავს!

მივრბივარ—ვიფუმფლები ფიფქ თოვლში, ვშიშობ—არ გა-
მექცეს-მეთქი.

— ყოჩაღ, ბიჭო!—მეუბნება ვიღაც...

— ბიჭო!—გამომალევიდა ყვირილმა.

სად იყო წყლის ქათამი—იდგა მამა და შოლტი ეჭირა.
ვხედავდი, რაშიც იყო საქმე, შაგრამ ტირილიც ვეღარ გავბედე.

— ბიჭო, აეთრიე ჩქარა და გაფრინდი ახლავე, თვარა
ტყავს გაგაძრობ!

კარგათ გათენებული არც კი იყო. შეფერადებული აღ-
მოსავლეთი ჰპირდებოდა ქვეყანას მზიან დღეს. ზამთრობით
მაქუტას*) რგებოდა ამოგორებული მზის მიღება და ახლაც
მოკაზმულიყო შესახვედრათ: ვარდის ფერი ღეჩაქი დაეხურა
თეთრ თავზე. მზიარულად ქუკუკობდნენ შაშვეები სუროზე.

მოუხედავად გავრბივარ სუფსისაკენ. ტალახი გზაზე გა-
ყინულა—აღარ მაგვიანებს.

— მე ახლავე დაგეწევი,—ჯერ კიდევ მესმის, მამამ რომ
მომეძახა.


— ნუ დამეწევა, ნუ, არ მინდა... არ მინდა იმის და-
ნახვა,—ვამბობ გულში:—აწი ნახოს, თუ მივურბინო შინ!

შეურიგდი ყველაფერს და აღდგომამდი სოფლისაკენ
პირი არ მიმიბრუნებია...

გაბრიელ გოგუაძე.

(შემდეგი იქნება)

*) მწვერვალია აკარა-გურიის მთებში.



ლომას ჩივილი.



ალო წამერთვა მუხლებში,
კისერი მომელალო;
ვერ იქნა, ველარ დაღეკეს,
ჩემმა კბილებმა ჩალო.

კაი ხანია უღელი
არ მდგმია კისერზედაო;
ველარ დაედღვიარ ხშირ-ხშირად
აღზევანს მარილზედაო.

პატრონიც გადამეკიდა,
მოჰბეზრდა ჩემი მზერაო;
თავიდან მოსაშორებლად
მას უწყუო გულმა ძგერაო.

მგონია, ჩქარა მომაბამს
აპეურს ბებერ რქაზედა
და გასასყიდათ გამიგდებს
ჩვენს დიდ ორლობე გზაზედა.

ჩარჩებს ხელთ ჩაუვარდები,
სახრეს გადმოშკვრენ ავადა
და სასაკლოოს მაწვევენ
უბედურს დასაკლოავადა.

ეს იყო ჩემი ცხოვრების
თავი და დასასრულიო?..
მისთვის ვშველოდი პატრონსა
მე დამწვარ-დადავულიო?!

ეჰ, ღმერთო!.. მუხლი კანკალებს,
კისერი მომეღალაო;
ვერ იქნა, ვეღარ დაღეკეს
ჩემმა კბილებმა ჩაღაო.

კაი ხანია, უღელი
არ მდგმია კისერზედაო,
აღარც დავდივარ სრულიად
აღზევანს მარილზედაო.

დ. ელიოზიშვილი.





ტროადის ომი.

პიესა 1 მოქმედებათ.

მოქმედნი პირნი:

აჰამემნონ მთავარ სარდალი.

კლიტემნესტრა მისი მეუღლე.

იფიგენია მათი ქალი.

აქილი შემოშარა გმირი.

ფეომარნი, მსახურნი.

გამოსვლა პირველი.

აჰამემნონ. შემოდის მსახურთა.

მსახური. (შემოდის) მთავარ-სარდალო, იფიგენია მოდის და საცაა სამხედრო ბანაკს მოაღწევს, როგორც ამომავალ მზეს ხალხი მხიარულად ეგებება, ისე თქვენ ახალგაზრდა ქალს მთელი მხედრობა სიხარულით ეგებება და სალამს უძღვნის. თქენი მეუღლე კლიტემნესტრაც იფიგენიას თან მოსდევს. თქვენს მეუღლეს, მთავარ სარდალო, სურს ნახოს თავისი სასიძო, ღმერთების თანადარი, აქილი და პირისპირ მიულო-

ცოს სიძე - ქალიშვილს მომავალი ბედნიერება. ღმერთო ჩემო! როგორი ბრწყინვალე დღესასწაული მოგველის, დიდებულო მთავარსარდალო, აღსდევ, მოატანინე ყვაილები კალათები, შეიმოსე თავი ყვაილებით და ნიშნად მადლობისა აღაგე მსხვერპლის შესაწირავი საკურთხევლები ღმერთების სადიდებლად და პატივსაცემლად! (გავა).

პაპიშვილი. (მწუხარებით ამოიოხრებს) როგორ უნდა მოვიტყე ახლა! როგორ უნდა ავაცდინო მე უბედურმა ჩემს ქალს სიკვდილი! რა უნდა ვუთხრა ჩემს კლიტემნესტრას?! შენ, ჩემო საყვარელო შვილო იფიგენია, შენ მოდიხარ სამხედრო ბანაკში ღმერთების თანადარი აქილის საპარტაძლოთ კი არა, საიქიოს, იმ ბნელსა და საშიშარ სამფლობელოში; მენელოს, გამარჯვება შენ დაგრჩება, რადგან იფიგენიას ამიერიდან ელინთა მხედრობის ხელიდან გამოგლეჯა შეუძლებელია! მხედრობა თავის დღეში ნებას არ მომცემს, რომ ჩემი საყვარელი ქალი სამშობლოს საკეთილდღეოდ ღმერთებს მსხვერპლად არ შევწირო. ლამის გული გამისკდეს ჯაფრისაგან, სულიერად და ხორციელად დავიტანჯები, როცა ჩემი ქალი მხოლოდ საკურთხევის წინაშე ვაიგებს საზარელ ამბავს, საყვედურით შემომხედავს და მეტყვის: „მაშა ჩემო, განა სასიკვდილოდ მიწვევდი?“ (ქვითინებს) იფიგენიას ვადარჩენა ყოველად შეუძლებელია, კიდევაც რომ მოვახერხო სამხედრო ბანაკიდან გაპარვა, ელინთა მხედრობა ერთიანად გაანადგურებს მთელ ჩემს სამშობლო მხარეს და ყველას სიკოცხლეს მოუსპობს. მე მხოლოდ იმას ვეცდები, რომ საბრალო დედამ ეს საზარელი ამბავი იფიგენიას მსხვერპლად შეწირვის შემდეგ ვაიგოს.

გამოსვლა მეორე.

იფიგენია, იფიგენია და კლიტემნესტრა შემოდიან.

იფიგენია. (მეივარდება მამას და ეხვევა. მამა პირს არიდებს) მამე, რადა ხარ აგრე დაღონებული?

პაპიმენონ. ვწუხვარ, რომ მალე უნდა მოგშორდეთ. ახლოვდება დრო, როცა ჩვენ ტროადზე უნდა გავემგზავროთ. თქვენი მოშორება გულს მიკლავს და ძალიან მალონებს. მანამ მე წავალ, კლიტემნესტრა, შენ სახლში დაბრუნდი, არ შეგფერის სამხედრო ბანაკში დარჩენა

კლიტემნესტრა. აპამენონ, მე მაკვირვებს შენი საქციელი, მგონი უფრო საჭირო არის ჩემი აქ დარჩენა, რომ საკუთარის ხელით მოვრთო ჩემი იფიგენია, გავაჩირაღდნო სანთლებით და დაესტკბე ქალისა და სიძის ცქერით. (აპამენონ გადის).

იფიგენია. დედა, მე ძალიან მაკვირვებს მამაჩემის ასეთი დაღონება.

გამოსვლა მესამე.

იფინაეე და აქილა.

აქილი. (შემოდის და სალამს აძლევს).

კლიტემნ. (მეიგებება) ძლივს ველირსე, შეილო, შენს ნახვას, მოხარული ვარ, რომ შენ ჩემი სიძე შეიქენ. ბედნიერება მოგცეთ ღმერთმა. (აქილი გაოცებული შესცქერის).

იფინაეე და მსახური.

მსახური. მთავარსარდლის მეუღლეე, იქნება თქვენ გგონიათ მართლა თქვენი ასული სადედოფლოდ მოუწოდეს აქ, არა, იგი უნდა მსხვერპლად შესწირონ სამშო-



ბლოს. გულთმისანმა უთხრა აჰამემონს, რომ თუ შენ მშვენიერ ქალს იფიგენიას შესწირავ მსხვერპლად ღმერთებს, მაშინ შენი სამშობლო მტრისგან განთავისუფლდებაო, თუ არა მტერი სულ გაანადგურებსო. (გადის).

აქილი. (გაბრაზებული) ნუ თუ ამისთანა საქციელი ეკადრება მთავარსარდალს!

კლითემნისტრი. (აქილის წინ მუხლთ მოიდრეკს. ტირის). გვედრები, დიდებული ქალღმერთის შვილო, დაიხსენ ჩემი საბრალო ქალი სიკვდილისაგან! თუმცა იგი, მართალია, შენი საპატარძლო არ გამოდგა. მაგრამ მაინც შენი გულისთვის მოვიყვანე ამ სამხედრო ბანაკში. შენი დიდებული სახელის შეურაცხობა იქნება, რომ ჩემი ქალი შენი სახელით მოტყუებული სიცოცხლეს გამოასალმონ, მხოლოდ შენ, მხოლოდ შენ შეგიძლიან გადაამირჩინო სიკვდილს ქალი. გვედრები, დიდებული გმირო, მოილო ჩვენზე მოწყალება, გვედრები შენ მფარველობას ნუ მოაკლებ საბრალო იფიგენიას! მხოლოდ შენ ხარ ჩვენი ერთად ერთი იმედი და მხსნელი!

აქილი. (აყენებს) პატიოსან სიტყვას გაძღვეთ, რომ მფარველობას ვაგიწევთ, ჩემი ხმალი ვასცემს პასუხს მას, ვინც შენს ქალზედ სასიკვდილოთ ხელს აღამალლებს! ცოტახანს წავალ, ისევ მალე დავბრუნდები. (გაეა).

ილიპენია. დედაე, აქილმა რომ დამიხსნას სიკვდილისაგან, რა ბედნიერება იქნება. მგონი მამა ჩემი მოდის, იმასაც უნდა ცრემლით ვთხოვო, ეგება ჩემმა ცრემლმა გული მოუღბოს და სიცოცხლე მიჩუქოს.

ზ ა მ ო ს ვ ლ ა 5.

ივინივე და აჰამემონი.

კლიმენტი (იფიგენიის), ყველაფერი, ყველაფერი ვიცი მეც და იფიგენიამაც! (იფიგენიას) იფიგენია, მოიყვანე შენი პატარა ძმა ორესტი და თვითონვე შეამოწმე როგორს ბრწყინვალე ქორწილს გიმზადებს მშობელი მამა. აბა, აჰამენონ, შეხედე შენს ქალს, როგორი მორჩილებით შემოგყურებს. მითხარ, რამ გაიძულა, რომ შეიღოს სიცოცხლეს უსპობ? განა იმიტომ რომ ელენე მენელაოსს დაუბრუნო? უმსგავსი და ფუჭსავატი ელენე განა ღირსია, რომ ჩვენი საყვარელი იფიგენია მას მსხვერპლად შევწიროთ. აჰამემონ, დაფიქრდი კარგად, რას ჩადიხარ? ხალხს რა უნდა უთხრა? აბა, დროებით მაინც წარმოიდგინე, როგორ უნდა გავძლო იმ სახლში საცა ჩვენი ქალი სიყმაწვილითვე მარდად დაცქრილებდა. ყოველი სახლის კუნჭული, ყოველი სახლის უბრალო ნივთი ჩვენს ცქრილა იფიგენიას მომაგონებს! როგორ უნდა შეესდგა ფეხი იფიგენიას დაცარიელებულ ოთახში! რას შეტყვიან დანარჩენი ჩემი ქალები, როცა გაიგებენ თავიანთ საყვარელ დის სიკვდილს. განა შემოიძლიან უთხრა, რომ მშობელმა მამამ მოუსპო თავის შეიღოს სიცოცხლე მეთქი! დაფიქრდი, აჰამემონ, რას ჩადიხარ! განა იფიგენიას სიკვდილის შემდეგ შეგიძლია აღაპყრო ღმერთებისაკენ სავედრებლად გასისხლიანებული ხელები? აჰამემონ, გვედრები თვალცრემლიანი, აჩუქე შენს ქალს სიცოცხლე! გახსოვდეს, რომ ელენეს უმსგავს საქციელისთვის ჩვენი საყვარელი და ღვიძლი შეიღოს სისხლის დანთხევა უმართებულო და შეუწყნარებელია.

ილიგინი. (მამას ყელზე მოეხვევა) მამავ, ჩემო საყვარელო მამავ! მე არ შემძლია ორფეისავით მძლავრი სიტყვებით მოგმართო. თორემ შენს განზრახვას უთუოდ შეგაცვლევინებდი. ორფეის მძლავრი სიტყვები უზარმაზარ მთებს ამოძრავებდნენ, და ნუ თუ ჩემი სიტყვები შენ გულს ვერ მოგიღობებენ! მე უბედურს, გარდა ცრემლისა არა გამაჩნია-რა! ჩემს მაგივრად მხოლოდ ცრემლები მეტყველობენ! მამავ, გვედრები შემობრალე, სიყმაწვილითვე ნუ მომისპობ სიციცხლეს, მეც სხვებთან ერთად დავსტკბე ბედნიერის ცხოვრებით! მოიგონე ის დრო, როცა სულ ჰაწაწინა ვიყავი, როცა აღერსით ამიყვანდი ხელში და ბავშური ტიქტიკით ყელზე გეხვეოდი და მე „ჩემო საყვარელო მამავ“, პირველადვე ასე გეძახდი! დედისა და მამის განუსახლვრელი სიყვარულით უდარდელად ვიზრდებოდი მშობებელ ოჯახში! გახსოვს მამავ, როგორ ხშირად ოცნებობდი ჩემს მომავალ ოჯახზე, როგორ ბედნიერებას მიქადდი ჩემს მეუღლესთან! განა ყველა ამის შემდეგ სასიკვდილოდაც მიმეტებ? არა, ჩემო საყვარელო მამავ, შენ მე სასიკვდილოთ ვერ გამიმეტებ, შენ არასოდეს დედაჩემს ასეთს მწურობას არ მიაყენებ; მამავ, სიკვდილი საშინელებაა, ხოლო სიციცხლე-კი ნეტარებაა, მზის სხივების ცქერა სიტკბოებაზე სტკბოებაა!

პაპიმონი.

თუმცა ჩემი გულიც იტანჯება, მაგრამ ჩემს გადაწყვეტილებას ვერ შევცვლი, მთელი ელლადის კეთილდღეობას გწირავ შეილო მსხვერპლად. შენი მსხვერპლად შეწირვა სამშობლოს განსაცდელისაგან იხსნის, რაზმების უფროსებმა ეს კარგად იციან და კიდევაც ამიტომ ითხოვენ მსხვერპლს. (საჩქაროდ გავა).

გ ა მ ო ს ვ ლ ა 6.

ივინივე და მუომარნი (შეარადებულნი).

1-ლი მხელპირი. ოდისეიმ ელინთა მხედრობას გამოგვიცხადა კალხასის წინასწარმეტყველობაო, ღმერთებს სურთ რომ იფიგენია შეიწიროს მსხვერპლადო.

მუომარნი (ყველანი) უსათუოდ უნდა შეიწიროს იფიგენია!

ილიენი. (გმირულად წამოდგება და მიუბრუნდება დედას) დედავ, ნუ სტირი, ტყუილად ნუ აფრქვევ ცრემლებს! მე საბოლოოდ გადავწყვიტე შევსწირო ჩემი სიცოცხლე სამშობლოს კეთილდღეობას. მთელი საბერძნეთის ყურადღება ამ ეამად ჩემკენ არის მოქცეული. ჩემი მსხვერპლად შეწირვა მხედრობას განსაცდელისგან იხსნის და მისცემს მას ტროადაზე გალაშქრების საშუალებას. ტროადელებზე გამარჯვება თავზარს დასცემს თვითეულს ჩვენს მტერს, რომელიც კი პარისის მსგავსად განიზრახავს ელინთა ოჯახის შეურაცხყოფას, მთელი საბერძნეთის სახელი და დიდება ჩემთვის უფრო ძვირფასია, ვიდრე ჩემი საკუთარი სიცოცხლე! ჩემ საყვარელ სამშობლოს კეთილდღეობისათვის მე მზადა ვარ სიცოცხლე გავწირო! დედავ, ნუ სტირი, ასეთ დიად საქმისთვის მე ყველაფერს შევწირავ! სიკვდილი სრულიადაც არ მაშინებს! თქვენ კი დიდებული ქვეყნის დიდებულნი მემომარნო, ჩემი მსხვერპლად შეწირვის შემდეგ უშიშრად გაილაშქრეთ მტერზე და მამაცად შეანგრით ტროადის სიმაგრენი! დეე, ილიონის ნანგრევებმა ვამიწიონ ძველის მაგიერობა!

ივანე და აქილი

მხმარნი. ვაშა შენს გმირობას, იფიგენია! გმადლობთ რომ ჩვენთვის და სამშობლოსთვის თავს იმეტებ!

აქილი. (ხმალს ამოიღებს და წარსდგება წინ) ამ ხმალმა უნდა მფარველობა გაუწიოს იფიგენიას!

ილიზინია. გაჩერდი აქილ, შენ ჩემი გულისათვის სისხლს ნუ დაღვრი, მე თვითონ ვწირავ ჩემს თავს. (აქილი ხმალს ჩააგებს და უკან გაიწევს).

ივანე და აჰამემონი.

აჰამემონი. (შემოვა თუ არა თვალებზე ხელს იფარებს და თვალს არიდებს).

ილიზინია. მამავ, თვალს რად მარიდებ? მე ჩემი ნებით, ჩემი სურვილით მივდივარ სამსხვერპლოზე, მე ბედნიერად ვთვლი ჩემ თავს, რომ სამშობლოს კეთილდღეობისათვის სიცოცხლეს ვწირავ! დიად, მე ბედნიერად ვთვლი ჩემს თავს, რომ ჩემი სიკვდილი ჩვენ საყვარელ სამშობლოს განსაცდელისგან იხსნის! მშვიდობით, ბედნიერად! ელინთა დიდებულ მხედრობას ვუსურვებ მტერზე გამარჯვებას და სამშობლოში მშვიდობით დაბრუნებას! (აჰამემონი გავა. იფიგენია დედას ეხვევა) დედავ, ნუ სტირი! მშვიდობით (გავა, მხედრობა თან გაჰყვება).

კლიმენესი. (მივა სავარძელზე დაეშვება და ქვითინს დაიწყებს) შვილო, გენაცვალოს დედა, იფიგენია, განა უშენოდ უნდა დაებრუნდე სახლში? რა უნდა უთხრა შენს დებს და ძმებს? როგორ უნდა გავძლო უშენოდ! ოჰ, აჰამემონ შენ გაიმეტე სასიკვდილოთ შენი მშვენიერი იფიგენია, შენ მოუსპე სიცოცხლე შენს უმანკო შვილს, ნუ თუ ერთი

ტკბილი სიტყვა აღარ მოგაგონდა, ნუ თუ შიშობ-
 ლიური სიყვარული ასე დაჰქარგე?

იგივე და მსახური.

მსახური. მთავარსარდლის მეუღლე! მიხარებია თქვენთვის,
 თქვენი ასული სიკვდილს გადარჩა, ღმერთებმა
 მსხვერპლად შევლი გამოგვიგზავნეს, იფიგენიას მა-
 გივრადა შევლს მოჰკვეთეს თავი!

კლიტემნესტრა. (საეარძლიდან წამოვარდება) ნუ თუ ჩემი
 ცქრილა იფიგენია ცოცხალია? ღმერთო ეს რა
 სიხარული მომეველინა (ხელებს აღაპყრობს).

პელაგია კანდელაკი.

ფ ა რ დ ა .





გულგულთ ხალგონივის ასული

ხ ა ლ ხ უ რ ი

(ზ ლ ა პ ა რ ი *).

VI

ღამეა. მეფის სასახლეს
ნისლი რამ შემოსწოლია,
გუშინდელს მეგლისს ყორანი
დაჰყეფს ვით ზამთრად თოლია.
მეფე მკმუნვარებს; მძიმედა
ქარვას სთელის სავიარძელშია,
ამ დროს შემოდის შიკრიკი,
რაღაც უჭირავს ხელშია.
ჰკადრა: „მეფეო, სამბრეთით
მტერი გვარტყია რკალადო,
თუ დროზე აღარ მივხედეთ,
ღლე დაგვიდგება ავადო“.
გამოერკვია მძლეთა მძლე,
შიკრიკს შეჰხედავს რისხვითა,
შუბს შემოუქნევს და კედელს
შეჰღებავს მისი სისხლითა.
ღლეს არ სცალიან მტრისთვისა
სულ სხვაა მისი ნაღველი,
ძის საიდუმლო სევდამა
გაუხმო ყანა, მთა-ველი.



მოუხმობს ბრძენსა, მკითხავენს,
 ხომ არიან მომიწამლაო,
 იქნებ თვალი სცეს? ჩვენს თავზე
 რა ქირმა მოიცალაო.
 მაგრამ არ იქნა: მკითხავენი
 სდუმდნენ, ვერაა გაიგეს,
 მარჩიელეებმაც ამაოდ
 გიშრის ხალიჩა დაიგეს.
 მემკვიდრეს დამწუხრებულსა
 ამაოდ ჰვედრის ხალხია,
 რომ გაიღიმოს, აჰხადოს
 შშობელთა მძიმე თალხია.
 ბნელს ოთახს გამომწყვდეული
 თვითვე სწვავს სულის ლელოსა,
 ყრუდ მოჭვითინე უხვად რწყავს
 ცრემლით ნორჩ გულის მდელოსა.
 მაგრამ შეჰხედეთ, ვერ უძლებს
 შინაგან გულის აღებსა,
 აღგება, დედას უკოცნის
 შუბლსა და დამწუვარს თვალებსა:
 „დედი მიშველე, გენაცვა,
 ვერ ვუძლებ კმუნვის ბალსაო,
 მრცხვენთან... ძუძუ მომშივდა
 როგორც უსუსურს ბაღსაო“.
 დედოფალს წასკდა სიცილი:
 „გიეო, რას ამატირეო?
 გეთქვა, გულს რაზე მიხეთქდი,
 მოთქმით რად დამამცირეო.
 აჰა, გასძეხი: ალუ — შენ!
 პაწაწა ბიჭო, ნანაო!
 კვლავ აღიდგინე ბავშვობის
 გულუბრიველო, ხანაო.

მისცა ვაეს ძუძუ. მაგრამ ზა,
 ჩაეარდა გასაქირშია,
 ვაემა ჩასქიდა კბილები,
 აყარა ვაი-ვიშია.
 „შვილო, რას მერჩი, მაკმარე,
 ვაი, მოგიკვდი დედო!“
 —რა ვქნა, დედილო, ამაზე
 მწარეა ჩემი სევდო.
 ვინ არის ბულბულთ ხელმწიფე,
 შითხარ მშობელო ჩქარო,
 სხვაზე აღარ მსურს ბაასი,
 კმარა: ჰოო თუ ირაო!
 თურმე ჰყოლია ასული,
 მზეთუნახავთა თვალიო,
 რომ გზა მიჩვენო შენს შობილს,
 ესაა შენი ვალიო!
 მაგრამ ვერარა ნუგეში
 მიიღო ვაემა დედისგან,
 გაკუდდა მისი ცდილობა,
 დაღნა შეგბნელი სევდისგან.

VII

გათენდა დილა. მეფის ძემ
 მოუხზო მამას, ამაღას,
 საქვეყნოდ ჭირსა აცხადებს,
 მძიმე განზრახვას არ მალავს:
 —მშვიდობით ჩემო დედ-მამავ,
 მშვიდობით ჩემო ყველაო,
 ხელს ნუღარ მიკერთ, თქვენს ცრემლებს
 არ მოაქვს ჩემთვის შევლაო.
 წავალ მოვძებნი საბედოს,
 გადვიტან გასაქირსაო,

მთასა და ბარსა შეეჩივლებ
 თუ რა იარა მკირსაო.
 ვივლი ცხრა წელსა და ცხრა თვეს,
 ცხრა დღეს, საათს და წუთსაო,
 თუ ამ დროს აღარ დავბრუნდე,
 შეუნდეთ ჩემსა სულსაო.
 მკვდარი ვიქნები. მიგლოვეთ,
 მაშინ მოისხით თალხიო,
 მაგრამ ამას ვთხოვთ, არვინ სთქვათ:
 „ახია უენზე, ახიო!“
 ამაღა არ მსურს, თან მახლდეს
 ჩემი აღმზრდელი—ლაღაო,
 იმისი სიბრძნე ნაცადი
 შეუფემ მომავლაო“.
 სთქვა და მშობლები ჩაიკრა,
 დაჰკოცნა კრემლით ტკბილადა,
 ერთხმად ატირდნენ: არ უნდათ
 შემკვიდრე გასაწირადა.
 დაემხნენ მოსთქვეს: „რომ მიხვალ,
 აქ ვის გვიტოვებ, განაო?
 აგვყარე ბარემ ყველანი
 და წაგვიყვანე თანაო.
 მერე და რა დროს! როს მტერი
 გვიჩვენებს მუშტით კუბოსო,
 უშენოდ გავწყდეთ, სახლკარი
 დაგვეწოს, დაგვეღუპოსო“.
 და რომ მოუღბონ ვაეს გული,
 მოაქვთ მის პაპის ხმალია,
 მუზარადი და ჩაჩქანი,
 აბჯარი, ჯავშნის ფარია.
 დედაც ეხვევა, ხუკუქსა
 კრემლითა ნამებით უფსებსა,

ქვითინით უთრთის ტუჩები,
 ვაებას ველარ უძლებსა.
 მაგრამ არ იქმნა, ვერ გასკრა
 მათმა თხოვნამ და ცრემლებმა,
 ამოოდ სცადეს ფარ-შუბის
 დამსხვრევა მიმაც მხედრებმა.
 —ვაგლახ, მეც ვჩივი რომ გტოვებთ
 ოდეს გეარტყია მტერიო,
 მაგრამ რა ვუყო, რომ სატრფომ
 ისარს უცვალა ფერიო.
 მან შე დამინთო მაშხალა,
 მონას მწვავს სულ სხვა აღითო,
 აღარ მსურს ციხე-კოშკები,
 თქვენ გამოვბთ პაპის ხმალითო..
 ველარ გავაპობ ზღვის ფსკერსაც,
 თქვენვე იზრუნეთ მისთვისო,
 სატრფოს აჩრდილიც მეყოფა,
 აქ დაყოვნება მიმძიმსო.
 თანაც გაჰშალა ალაში,
 ჰშორდება მშობლებს, მხედრებსა,
 ვეზირი მისდევს. რას აქნევს
 თუ ვინ სად რად ჰღვრის ცრემლებსა.

VIII

მიდიან ჩენი მგზავრები,
 აჰყენენ შავ ბედის წერასა,
 ბევრი იარეს თუ ცოტა,
 გასცდნენ ცბრა თოვლის მწვერვალსა.
 გზა-გზა ჰკითხავდნენ: „სად არის
 ბულბულთ ხელმწიფის კარიო“,
 მაგრამ პასუხად ესმოდათ:
 „მზგავსი რამ არსად არიო!“

ვეზირი ართობს, ასწავლის
 ფრინველთა ენას, ჩურჩულსა,
 მცენარეთ ფოთოლთ შრიალსა,
 თუ წყაროს ტიკტიკ-ჩუხჩუხსა.
 მიდიან შეუსვენებლივ,
 უკან არ იხედებიან,
 თანდათან ძუნწობს ბუნება,
 მგზავრიც გზად აღარ ჰხედებიან.
 ხმება ბალახი, ხეხილი,
 წყალნი წყდებიან, ჰშრებიან,
 თითქოს მიწამან პირი ჰქნა
 ყველა კვდებიან ჰქრებიან.
 ტრიალ უღაბნოს შუაგულს
 უკვალოდ იკარგებიან,
 ხშირად მუხლისა ქარისთვის
 ცხელ-ცხელს ქვიშაზე სხდებიან.
 ერთფეროვანობს ბუნება,
 ქარი სდუმს, სიცხის ლულია,
 მოსწყინდა ვაჟსა ამდენი
 ტანჯვის გზით სიარულია.
 გაწამებულსა თვალეგზე
 არ ეკიდება ძილია,
 წარხდა, წაეიდა, ვარდს აქცნობს
 ყრმის ჩუმი სინანულია.
 შეიღმა დღემ განვლო ამ ყოფით,
 გზა არის მეტად მწირია,
 ცეცხლს გაღუბუგავს ყოველი,
 არა სჩანს ნამი მცირია.
 აგერ გრიგალმაც დაჰბერა,
 ოქროს მტვერს ატრიალებსა,
 გმინვა გაჰხდება მიწასა,
 ცას ბუქით აგრიალეგსა.

ქვიშად წამოჰყრის ჩონჩხებსა,
 ძვალთა მტვერს ანიავებსა,
 კუპრი თვალსა სთხრის, თითქოს ცა
 უშვებს მანე სულთ, ავებსა.
 ვაჟი შეძრწუნდა. ვაგებით
 დაითხრის გიშრის თვალებსა,
 ღმერთს საყვედურსა შესტყორცნის,
 გულს იგზნებს ცეცხლის აღებსა.
 ნუ თუ წავიდა, აღსრულდა,
 მეფის ძე, განწირულია?
 ხსნა არ სჩანს, მისი ქუდბედი
 ასე შავბნელად კრულია?
 აგერ, მეფის ძე ისე სქვრეტს,
 თითქოს გამოჩნდა ცხერის ფარა,
 მოჩვენებაა თუ ქარმა
 ბისტი თვალს გადააფარა?
 „ვაგლახ, წავიდა,—სთქვა კვენესით:
 დედაბრის წყევლა ხდებოა,
 სადაური ვარ, სად ვკვდები,
 უწყალოდ სული მხდებოა“.
 მართლაც, შეხედეთ, ქაბუკის
 უგვანო ბედის წერასა!
 გრიგალი შავ ფრთით აფარებს
 ქვიშნარის შავბნელს ზეწარსა.
 წიალ-წიალით ყვილი
 გაუდით ყორანს, ძერასა,
 ვეზირი ვაჟსა კალთის ქვეშ
 უფარავს გულის ძგერასა.
 აგერა, სვანნი ბრკყალებით
 ქვიშას ძირამდე სწვდებიან,
 ფრთების ფართხალით ქალასა
 იტაცვენ, აფრინდებიან.

წალმა და აღმა გუნდ-გუნდი
 ერთმანეთს ედევნებიან,
 ჰყეფენ, იბრძვიან, ერთურთსა
 მსხვერპლს კლანჭით ეცილებიან.

IX

ეს რა ამბავი ტრიალებს
 მეფის ძის თავზე ტიალსა,
 ბედი არც გრიგალს აკმარებს,
 არც თუ ყვავ-ყორანთ წიალსა.
 აგერ ჩვენება—ჩონჩხები
 იწყებენ თითქოს გრიალსა,
 კუნაპეტ ცის ქვეშ ციმციმით
 ვარსკვლავი იწყებს ცქრიალსა.
 მის წინ მხედრები დგებიან,
 იგებენ შწვანე კარავსა,
 მხარ თეძოს წამოწოლილნი
 ნელად ითელიან ქარვასა,
 წყვილ-წყვილად ბედაურთა წინ
 მხარი მხარს უძევს ქალ-ვაესა,
 იქვე მოხუცი ჩიბუხს სწევს,
 ჩამოჰკრავს კვესით სალ კავსა.
 ვინ უნდა იყვნენ? სად მიჰყავთ
 აქლემთა ქარაფანია?
 არ ეშინიანთ, ჩაუნთქოთ
 უდაბნოს ქარმა ნავია?
 რა ბრძანებაა! ლხინობენ,
 აგერ ტაშს დაჰკერენ ამბითა,
 ქალი გამოდის კისკისით,
 მარმაშის ლეჩაქ-კაბითა.
 შიშველ მკლავებზე არტყია
 ძვირფას თვლის სამაჯურები,

აღმას-ლოლისა კუნწულით
 ჰშვენის ვარდნარი ყურები.
 ცეკვას მოჰყვება. ვარსკვლავებს
 ძირს ჩირაღდნებათ ინთებსა,
 ოქროს ქოშს იხდის, გასტყორცნის,
 გაატყაყუნებს თითებსა.
 ქარბუქით იწეწს დაღალ-კავს,
 დაირას დაჰკრავს ცერიითა,
 ხან ტაშს შემოკრავს, სრიალებს
 სარ მრხვევლი ცეკვითა.
 აგერ, შეიხსნის გვირგვინსა,
 ვაჟს მოჰხვევს შმაგად მკლავებსა,
 თან შემოაფლებს კისერზე
 გველსავით გიშრის კავებსა.
 მსუბუქად მერნად შეისვამს,
 გადაუკოცნის თვალებსა,
 მერანს შეუტევს, გაჰქრება,
 შორს სტოვებს მამის კარვებსა.
 თან მიჰყვებიან ყივილით
 ყვავი, ყორანი, სვავია,
 სირაქლემა თუ კანჯარი,
 ლომი, ძუ ვეფხი ავია.
 ქალი კი მიჰქრის. მერანი
 სრიალებს ღრუბელთ ზვირთითა,
 მთელსა უდაბნოს გადარწყავს
 წურწკურა ოფლის დვითქითა.
 აგერ, გაჰკვეთა ჰაერიც,
 უდაბნოს შორად სტოვებსა,
 უცნაურს ედემს ეწვევა,
 კეკლუცებს, თავის სწორებსა.
 რა ქვეყანაა, ჰირიმეთ,
 არ გამოითქმის ენითა,

უკვდავებისა წყაროს წინ
 კედლებიან მეთის ლხენითა.
 ბზის მოშრიალე ფოთლებ ქვეშ
 მეფის ძეს მიიძინებსა,
 და ასე ეტყვის, ვიდრემდე
 მალ მერანს გაატრინებსა:
 „იძინე, ყრპაო, შენი ვარ,
 ბულბულთა მეფის ქალიო,
 აგერ, მოველი, განახევი,
 მოგწმინდე ორთავ თვალიო.
 ნუ შეპიდრკები. შორსა ვარ
 შეგნება, მზისა ალიო,
 რომ შიპოენიდე, ეს არის
 შენი მუღმივი ვალიო“.

X

გამოელევიდა. მეფის ძე
 სიზმარს იგონებს ტკბილსაო,
 ირგლივ უდაბნოს რომ ჰხედავს
 ისევ შეჰნატრის ძილსაო.
 ვეზირი ეტყვის: „იყუჩე,
 მიზნამდინ ჯერ ვართ შორსაო,
 მადლი ღმერთს, გრიგალს გადურჩით,
 როგორც ხობობი ქორსაო.
 შენ რომ სიზმრებში სკურავდი,
 მეც მოგვევებოდი თანაო,
 წამწამთ რხევაზე ვიცანი,
 რა ბედმა წაგიყვანაო.
 ეგრე ფარხმალის ჩამოყრა
 არ გშვენის მეფის ძესაო,
 ადრე თუ მალე მივაგნებთ
 ბულბულთა ხელმწიფესაო.

იმ ასულმაც ხომ ეს ვითხრა,
 განიშნა თეთრის ხელითა,
 აფრა აფუშვით, არწივი
 გვიწვევს შავ ფრთების ქნევითა“.

მართლაც, გამოჩნდა არწივი,
 კანჯარსა დასდევნებოდა,
 ფრთებს რომ თვალეში დასცხებდა
 ნისკარტით კისერს სწვდებოდა.

საბრალობელი პირუტყვის
 ძარღვებში ცეცხლი სდგებოდა,
 ფეხს აჩქარებდა, მაგრამ მით
 მაინც ვერასფერს ჰხდებოდა.

მაშინ შეფის ძემ ორპირი
 დანა შესტყორცნა ქვევითა,
 გული გაუპო არწივისა,
 ძირს დაანარცხა ფრთებიტა.

„ასე ვიბრძოლო, არ დავცხრე
 ვიღრე მტრობს ჩემი ბედით,
 საკუთარ გულსაც გავფათრავ,
 მერიდოს შავი გედითა“.

სისხლ შეუმშრალი ორპირი
 ჩაიდვა ვაჟა უბესა,
 ან ვით დასცხრება, ვიღრემდის
 არ ჰპოვებს ბედით ნუგეშსა?

კანჯარი მადლსა მიუძღვნის,
 ზურგზე შეისვამს მხსნელებსა,
 უდაბნოს ისე გაიბუნს,
 არც ერთგან დაისვენებსა.

როს სამშვიდობოს გავიდა,
 აქ ნაბიჯს შეინელებსა,
 გადმოსხავს მგზავრებს, უმაღვე
 მიჰმართავს ქვიშის ველებსა.

ვეზირი იტყვის: „ჰხედავ, რომ
 კირს ჰმართებს გამაგრებაო,
 ნაყოფი ტკებთა, რამდენად
 ძნელია მისი კრებაო“.

დ. კასრაძე.

(შემდეგი იქნება)



უცნაური ყმაწვილი

I

პირველი გაცნობა.

მწვანე კვილოს ღობე მოსდევდა მშვენიერ აღმართს, გადადიოდა მის მეორე მხარეს, გრძელდებოდა პატარა მოჩუხჩუხე ნაკადულს იქით, ისევ მალა აღიოდა და იკარგებოდა ტყით დაფარულ პატარა გორაკებზე. მაგრამ დონალდს, რომელიც დიდი ხანია მიჩვეული იყო თავის სავარძელს, შეეძლო მხოლოდ შორიდან ეცქირა ამ მომზიბლავ ბუნებისათვის. მან სთხოვა ვილიამს მიეყვანა ის იმ ბაღის კუთხეში, საიდანაც შეეძლო დაენახა, როგორ ხედებოდნენ ერთმანეთს მწვანე ღობე და ცქრილა ნაკადული, იმის იქით კი დონალდს არაფრის დანახვა არ შეეძლო.

წყნარი და ჰკვიანური სიღინჯით უგდებდა ყურს ვილიამს, რომელიც არწმუნებდა მას, რომ ძლიერ ძნელია, თითქმის შეუძლებელი, სავარძლის აღმართზე აგორება და დასთანხმდა დარჩენილიყო ძირს, დაფნის ხეების ქვეშ. თუმცა დონალდი უკვე მიჩნეოდა მორჩილებას, მაგრამ მაინც საშინელი სევდა იგრძნო, როცა გახედა მშვენიერ მწვანე მდელს, რომელიც მოსჩანდა ხშირ ხეების შორის და რომელიც ისეთ მომზიბელელ სილამაზეს ჰფენდა იმ არე-მარეს.



რა კარგი იქნებოდა, რომ შეეძლოს გადმოხტომა თავის მძიმე სავარძლიდან და არბენა იმ აღმართზე, რა სიამოვნებით დაათვალიერებდა აგერ იმ ცისფერ ფრინველს, სანამ ის მოასწრებდა გაფრენას და დამალვას. რომ შეეძლოს, მხოლოდ... მაგრამ უეცრივ თავის პატარა, უმწეო ფეხებში იგრძნო ტკივილი, აუტანელი სიმძიმე და დაქანცულივით მიხუჯა თვალები.

— შენი აქ ყოფნა არ არის საჭირო, ვილიამს,—სთქვა მან,—მე, უეკველია, საღამომდის აქ დავრჩები.

— მე თქვენ მომვლელი ქალის მაგიერობა უნდა გაგიწიოთ,—უბასუხა ღიმილით კაცმა.

— ნუ გეშინია, მე მომვლელ ქალსაც ხშირად მთელი დღით ვიშორებ ხოლმე. მე ვფიქრობ... მე მგონია, რომ ჩემთვის მარტო დარჩენა უკეთესია. თუ შენ საჭირო იქნები, მე მაქვს აი ეს,—და მან გააქნ-გამოაქნია ვერცხლის სასტვენელი, რომელიც მიბმული იყო მის სავარძელზე.—რაც უნდა შორს იყო ამის ხმას მაინც გაიგონებ; მაგრამ, დარწმუნებული ვარ, დასტვენა არ მომიხდება ასეთ მოკლე ხანში.

მისი დაღლილი ცისფერი თვალები კვლავ მიინახნენ და უღონოდ თავით მიეყრდნო ბალიშებს. ვილიამსი კიდევ რამდენიმე ხანს ყოყმანობდა, მაგრამ ისევ წასვლა ამჯობინა.

როდესაც მისწყდა იმისი ფეხის ხმა, დონალდმა გაახილა თვალები და შეხედა მშვენიერ ლურჯ კას, რომელიც გამოსკვიოდა ხეების ხშირ ტოტებში. მწევანე ღობის იქით უცბათ რაღაც არაჩვეულებრივი შრიალი გაისმა, მას მოჰყვა ხშირი ქოქინი, ფეხის ხმაურობა, ჩუმი წამოძახილი და ყველა ამის შემდეგ მწევანე ღობის იქით გამოჩნდა წყვილი ფეხი მიხაკისფერ ყელმოკრილ ფეხსაცმელებში. დონალდი აღტაცებით შესცქეროდა ფეხებს: ისინი განსაცვიფრებელი სისწრაფით იხლართებოდნენ და იშლებოდნენ. ბოლოს ფეხებმა შესწყვიტეს მოძრაობა, წამს გაშეშდნენ და უცებ გაქრ-

ნენ, მათ მაგიერ კი გამოჩნდა აბურძგნული ქერა თავის ქვედა ღრუსა და თავის პატრონმა, რომელიც ღობის იქიდან გამოჩნდა, დაუწყა დონალდს ცქერა.

— რა კარგი იყო! თუმცა ძლიერ ძნელი კია!— წამოიძახა ქერა თავის პატრონმა. — თავი კი სულ მტვერით ამეფსო, — განაგრძო მან — და ლაპარაკის დროს კი იწმენდდა ცხვირსახოცით გაოფლიანებულ კისერს, სახეს და თავს.

— რას აკეთებდი? — შეეკითხა დონალდი.

— თავით დავდიოდი. შენ როდისმე გიციდია თავით სიარული? — შეეკითხა ის თავის მზრივ და თან ისევ მტვერს იშორებდა.

— არა, — დინჯად მიუგო დონალდმა. — მე სრულებით არ შემიძლია სიარული.

ყმაწვილი სწრაფად მიბრუნდა მისკენ და მის სახეს სიბრალოლის და აღერსის გრძნობა გადაეფინა.

— ოჰ, საწყალო ბავშვო! წამოიძახა მან, წაველო ხელი ხეს, ახტა ღობეზე და მსუბუქად დაეშვა მიწაზე.

დონალდმა გაოცებით შეჰყვირა:

— რა მოხერხებულად და მარდად ვადმოხტი! — შენიშნა მან, — შენ სასწავლებელშიაც ასეთ ოინებს აკეთებ?

მომღიმარი სახე ყმაწვილისა სწრაფად მოიღუშა, ტუჩები მაგრა მოკლე და მერე მწარედ ჩაიციხა.

— არა, მე ახლა სასწავლებელში აღარ დავდივარ, — უპასუხა მან, — თუმცა მე სხვა თერთმეტი წლის ბიჭზე ცუდად არ ვთამაშობ სასწავლებელში, მაგრამ რადგანაც მოწაფედ აღარ ვითვლები, ამიტომ ბურთაობაშიაც აღარ შემიძლია მივიღო მონაწილეობა და ჩვენმა ჯგუფმა წააგო თამაში.

— განა არ გინდა სასწავლებელში სიარული?

— არ მინდა?!. ოჰ, პატარავ, რომ იცოდე...

— მაშ რატომ არ დადიხარ?

— იმიტომ, რომ სასწავლებლის კარები ცხვირწინ დამიკეტეს და უარი მითხრეს მის გაღებაზე, სანამ არ მოვით-



ხოვ ბოდის იმისთვის, რაც არ ჩამიდენია. ახლა კი აქ გამოგზავნეს, რომ კარგა დაფიქრდეს ჩემ ცუდ საქციელზე და იმ დანაშაულზე, რომელიც სრულებითაც არ ჩამიდენია. ცუდ საქციელზე ფიქრი კი არის...

— რატომ არ უამბობ და არ აუხსნი ყველა ამას მამაშენს?

ყმაწვილის სახეზე შეურაცხყოფა და მრისხანება გამოიხატა.

— იმიტომ, რომ ჩემი მამა... მაგრამ სჯობია სხვა რამეზე ვილაპარაკოთ. მომიყე, ბიჭიკო, შენ რა დაგემართა?

— ჩემ ფეხებს რაღაც მოუვიდა, — დონალდის ხმაში ცრემლები გამოკრთოდნენ, — აგერ სამი წელიწადია ველარ დაედივარ...

— მაგ ხნის განმავლობაში სულ ავად იყავი?

— არა, ავად სრულებითაც არ ვყოფილვარ, მაგრამ ვიღლები, ყველაფერი მღლის. ექიმმა ჩვენ ეს აგარაკი ამოგვირჩია, რადგანაც ქალაქი ძლიერ მღლის. უკვე ერთი თვეა აქ ვცხოვრობთ და მომწონს კიდევ აქაურობა. მაგრამ თუ ექიმი ბურჩარდი ვერ შესძლებს აქ ჩემს მორჩენას...

— ექიმი ბურჩარდი?

— განა შენ იცნობ ექიმ ბურჩარდს?

— ცოტათი, — ყმაწვილის სახე წამით გაბრწყინდა სიამაყით. მერე კი ისევ დაიწყო ვითომც უგულოდ. — ის, მე მგონია, ქალაქში სცხოვრობს საზოგადოთ და იქ საავადმყოფოში მუშაობს. აქ ახლო კი მას აქვს აგარაკი, აგარაკში ახლა არავინ სცხოვრობს; ყოველ შემთხვევაში ისეთი არავინ სცხოვრობს, ვისი გახსენებაც ღირდეს.

— ოჰ, შენ ბევრი რამ გცოდნია ჩემ ექიმზე! ის დარწმუნებულია მომარჩენს და მალე ფეხზე დამაყენებს. მაგრამ თუ სიარულითაც ისე დავიღალე, როგორც ახლა ჯდომით ვიღლები... ოჰ, რომ იცოდეს როგორ დამღალა სავარძელმა!

— ხშირად გტოვებენ ასე მარტოს?



— მე მიყვარს მარტო დარჩენა. მომვლელი ქალი და ვილიამსი ძალიან მღლიან.

— შენი დედა?

ბავშვს ცისფერი თვალები ცრემლებით აევსო, მაგრამ თავი შეიკავა.

— აი სწორედ მაგაშია საქმე, — სთქვა მან, — რომ აქ არა მყავს დედა. უქიშმა ბურჩარდმა სთქვა, რომ დედა აქედან უეჭველად უნდა წავიდესო. მას შემდეგ, რაც დედა წავიდა უკვე ერთი თვე და ოცი დღე გავიდა.

— მამაშენიც იმასთან ერთად წავიდა?

— მამა ხან ჩემთან ცხოვრობს, ხან დედასთან. დედა ჩემთან აგზავნის, მე კიდევ დედასთან. საწყალი მამა!..

— მაშ შენ ისეთი არაინა გყავს, ვინც წიგნს გიკითხავს, ზღაპრებს გეტყვის, ან...

— მე კითხვა ძლიერ მღლის, მე მაშინაც კი ვიღლები, როცა ზღაპარს მიამბობენ.

— ზღაპრები გლალავს? — შეჰყვირა ყმაწვილმა და უცებ დაუმატა: — მე ვიცი რატომ იღლები. შენ არ იცი?

კითხვა ისე უცხად იყო მიცემული, რომ დონალდი შეხტა.

— არა, არ ვიცი.

— იმიტომ, რომ ზღაპარს ყოველთვის თავიდან გეუბნევიან, ხომ მართალია?

— რასაკვირველია თავიდან! მაშ საიდან უნდა დაიწყონ?

— საიდანაც უნდათ, მხოლოდ თავიდან კი არა. მაგალითად, ბოლოდან, შუადან, ან კიდევ სხვა ადგილიდან.

დონალდმა გაიღიმა და უნდობლად გადახედა ყმაწვილს.

— შემოგხედოს კაცმა ეაქვას გავხარ, — უთხრა მან, და ასეთ სისულელეს კი ლაპარაკობ.

— სისულელეს? მე? არა, სრულებითაც არა! მე ყოველთვის დაფიქრებულად და ბრძნულად ვლაპარაკობ. ტყვილა კი არ შეძახიან სოლომონ ბრძენს!

— მითხარი ერთი, როგორ მოჰყვები ზღაპარს, რომელიც ბოლოდან იწყება?

დონალდს თვალები სულ დაკვირვებით გაუმრგვალდა.

— ეგ ძალიან ადვილია, — უთხრა უმაწვილმა. — საშინელი სისულელეა ზღაპრის თავიდან დაწყება. აი, მაგალითად, ზღაპარი პატარა თევზებზე, რომლებიც სცხოვრობდნენ მთვარის გზაზე. ამა მითხარი საიდან დაიწყებდი შენ ამ ზღაპარს?

— მე ეგ ზღაპარი არ ვიცი, — სთქვა დონალდმა.

— რასაკვირველია არ იცი, მაგრამ რომ იცოდე საიდან დაიწყებდი? უეჭველად ასე: „იყო და არა იყო რა, იყვნენ პატარა თევზები, რომლებიც სცხოვრობდნენ მთვარის გზაზე“...

— მართალია, საზოგადოთ ზღაპრები ასე იწყება.

— აი სწორედ ეგ არ არის მართალი, ზღაპრის მთქმელმა უნდა ეცადოს რაც შეიძლება დაშორდეს ზღაპრის დასაწყისს. აი, მაგალითად, ამ ზღაპრის დაწყება შეიძლება ასე: „როგორც კი ზღვის ვეშაპი მოიტაცა და დაპყეტა ყინულის მთაში, კეთილი მოხუცი მსუქანი სელაპი (ზღვის ღორი) დაბრუნდა შინ და დაპყვირა საყვირით თავის ნიშანი: — ყველგან სიმშვიდეა“. იმავე წამს გამოჩნდნენ პატარა თევზები და დაიწყეს ცეკვა მთვარის გზაზე. იმათი ქრიაშული და ცეკვა მთელი ღამე არ შეწყვეტილა“.

— სად არის მთვარის გზა? რა უქნა ვეშაპმა პატარა თევზებს? საიდან იცოდა სელაპმა...

— შენ თვითონ იცი სადაც არის მთვარის გზა. მთვარის გზა ჰქვიან იმ გრძელ, ძლიერ გრძელ მთვარის შუქს, რომელიც ჩადის წყალში და იქამდის გრძელდება, სადამდისაც ჩასწვდება ადამიანის თვალი. მთვარის გზაზე ცხოვრება და თამაში შეუძლიანთ მხოლოდ ძალიან კეთილ და ბედნიერ პატარა თევზებს. შენ რომ შეგეძლოს იმათთან ახლო მისვლა, დაინახავდი როგორ დასრიალებენ ისინი და აქყაპუნებენ თავიანთ ვერცხლის კულებს.

— ვეშაპი და სელაპი ვინ არიან?

— სელაპი არის მცველი, რომელიც ყურს უგდებს წესიერებას ზღვაში. ის ძლიერ დიდია, მსუქანი და მედიდური საშინლად ეჯავრება ისეთი ყაჩაღები.

— როგორი ყაჩაღები? — დონალდს სახეზე აღელვება და ეტყო და ლოყები არაჩვეულებრივად შეუწითლდნენ.

— აი, მაგალითად, ზღვის ვეშაპი. საქმე იმაში იყო, რომ ვეშაპი ჩუმად მიეპარა პატარა თევზებს და გასწკვლა სამი ფერია, რომლებიც თევზებთან ცეკვავდნენ და რომლებიც არაფის არას უშავებდნენ. ყველას შეეშინდა. პატარა თევზები წრიბინებდნენ, ფერიები ყვიროდნენ, ლოკოკინები კი უსტვენდნენ და ყველა სელაპს უძახოდა.

— ვეშაპი თანახმა იყო სელაპს გაჰყოლოდა?

— ოჰ, რასაკვირველია, ის გაიბუტა, გაიბერა, მაგრამ ყველა ზღვის ცხოველი, თვით უზარმაზარებიც კი დიდ პატივსა სცემენ კანონს და ამიტომ... ამიტომ...

ყმაწვილი ლობისკენ გაეშურა.

— უკვე მიდიხარ? — დონალდის ხმა საცოდავად ჰკრთოდა?

— მივდივარ და, მგონი, შენც მალე წაგიყვანენ აქედან, — უპასუხა ყმაწვილმა, — აქეთკენ ვილაც მოდის.

— ხვალ ხომ ისევ მოხვალ, ბიჭიკო?

— გინდა, რომ მოვიდე?

— ოჰ რასაკვირველია, ძლიერ მინდა. შენი სახელი რატომ არ მითხარი?

— მე უკვე გითხარი ჩემი სახელი, — უპასუხა სიცილით ყმაწვილმა.

— სოლომონი ხომ არა გქვიათ მართლა?

— სოლომონ ბრძენი, — და ყმაწვილმა მედიდურად დაუკრა თავი.

— ეგ სახელი სრულებითაც არ არის შენი შესაფერი!

— ჩემი შესაფერი არ არის?!


— არა! მე შენ „უცნაურ ყმაწვილს“ დაგარქმევ.

ყმაწვილმა გაიციინა.

— „უცნაური ყმაწვილი“! რა ვქნა, იყოს ნება შენი; ალბად დავიმსახურე ეგ სახელი. მაგრამ, იცი რა, ბიჭიკო, ნურავის ეტყვი, რომ მნახე. სჯობია მე შენი საიდუმლოება ვიყო. მაძლევ სიტყვას?

— გაძლევ.

ერთი წამის შემდეგ დონალდს მოესმა ლობის იქით მიმავალი ფეხის ხმა და იმავე დროს მასთან მივიდა ვილიამსი.





გიორგი მათაუშვილი.

ჩვენმა ქურნალმა „ნაკადულმა“ დაკარგა მოსიყვარულე, ერთგული თანამშრომელი გიორგი მათეშვილი, ბავშვების აღმზრდელი და მასწავლებელი. განსვენებული გიორგი ოცი წლის განმავლობაში მასწავლებლობდა, ეწეოდა ამ მძიმე შრომას, რომლის დიდი მნიშვნელობა კარგათ ესმოდა. 1906 წლიდან იგი თანამშრომლობდა ქურნალ „ნაკადულში“, სარედაქციო კომისიის წევრი იყო. დანიშნულ დღეს, კვირაში ერთხელ, თავს მოიყრიდნენ ხოლომე რედაქციაში კომისიის წევრები და შეუდგებოდნენ მუშაობას. რედაქციას სხვა-დასხვა მხრიდან, სოფლებსა, დაბებსა და ქალაქებიდან მოსდიოდა ყოველნაირი დასაბეჭდა მასალა—ლექსები, მოთხრობები, სამეცნიერო წერილები და სხვა. სარედაქციო კომისიას უნდა წაეკითხა მთელი ეს მასალა და აერჩია დასაბეჭდათ გამოსადეგი ნაწერი. უნდა გენახათ, როგორ დინჯად ეკიდებოდა განსვენებული გიორგი ამ შრომას. როგორი ყურადღებით უსმენდა კითხვას, როგორი მოფიქრებით გამოსთქვამდა თავის აზრს იმის შესახებ, ვარგა თუ არა ესა თუ ის ნაწერი დასა-

ბექდად და რა ნაკლი და რა ღირსება აქვს. გიორგიმ კარგად იცოდა, თავისი პირადი გამოცდილებით, როგორც მასწავლებელმა, რომ ბავშვებს უყვართ ნაბექდი წიგნებისა და ჟურნალების კითხვა, იცოდა რა მოსწონთ და რა არ მოსწონთ ბავშვებს, იცოდა რა ცოდნაა მათთვის სასარგებლო და რა არის მათთვის ბავშვებისათვის, იცოდა კარგად ყველა ეს, ყოველთვის ცოცხლად ეხატებოდა თვალწინ ბავშვების სახე, ამიტომ კომისიაში მისი ამხანაგები ყურადღებით მოისმენდნენ ხოლმე იმის აზრს ამა თუ იმ ნაწერის შესახებ, ვარგა იგი დასაბეჭდათ თუ არა, და თუ დასაბეჭდად გამოსადეგია, მხოლოდ რაოდენი ნაკლი აქვს, როგორ უნდა შესწორდეს, რა უნდა გამოეკლოს ან რა მიემატოს.

განსვენებული გიორგი სარედაქციო კომისიის წევრობასთან ერთად მწერლობასაც ეწეოდა, დრო-გამოშვებით მოქონდა რედაქციაში დასაბეჭდად თავისი ნაწერები, რომელთაც ბოლოში თავის სახელს, გიორგის, აწერდა. ყველა ეს ნაწერი ბავშვების ცხოვრებას შეეხებოდა, იმათი შინაარსი ბავშვებისათვის საგულისხმეო იყო. ჩიტები, ფრინველები, შინაური ცხოველები, კატა, ძაღლი, ცხენი, ხარი—ხშირი სტუმრები იყვნენ გიორგის მოთხრობებში, რადგან ყველა ესენი გულით უყვართ ბავშვებს, მეტადრე იმათ, ვინც სოფელში ცხოვრებს, ხშირად ჰხედავენ ამ ცხოველებს, ხშირად თამაშობენ მათთან, მათთან ერთად იზრდებიან, შეჰხარებიან ცხოველებს და ებაახებიან, როგორც თავის ტოლებსა და ამხანაგებს.

გიორგის მოთხრობებს რომ კარგად დააკვირდეთ, შეატყობთ, რომ იმასაც ახარებს დღესასწაულები—შობა, ახალი წელიწადი, აღდგომა,—რადგან ეს დღეები ბავშვების საყვარელი დღეებია. ბევრი რამ სასიხარულო ელის ამ დღეებში ბავშვებს—ჩურჩხელა, გოზინაყი, ნამცხვრები, შობის ხე, სტუმრები, მუსიკა, ცეკვა—თამაში, ყოველნაირი გართობა. ღიმ-მორევით, სიხარულით ასწერს, ხოლმე თავის მოთხ-

რობებში ამ დღეებს ჩვენი ძვირფასი მწერალი, ჩუჩხელია, გოზინაყი, ნამცხვარი—ეს შედარებით პატარა რამ პირის ჩასატკბარუნებელი, დიდ რამედ იქცევა, ხოლმე გიორგის კალმის ქვეშ. პატარა რამ ტკბილეულობა—დიდი ამბავია ბავშვის ცხოვრებაში, გიორგიმ კარგად იცოდა ეს, და ამიტომ სწერდა ხოლმე ასეთი ალერსიანი ღიმილითა და სიხარულით.

მშვიდობიანი, დინჯი, წუნარი და მოსიყვარულე გიორგი აღარ გვყავს. მაგრამ დღეს იმისი ნაწერები რომ გადავშალე და გადავიკითხე, ვიგრძენ, რომ მწერლის ნაწერში იმისი ცოცხალი სული ტრიალებს, იმისი ღიმილით, იმისი გულის ცხველი სხივითაა გაშუქებული ჩვენ ვეღარ ვიხილავთ გიორგის მშვიდობიან სახეს, იმის დინჯ თვალებს, იმის ცოცხალი, მოსიყვარულე სული კი ჩვენთან დარჩა, იმის ნაწერებში ცოცხლობს.

ილია ნაკაშიძე.





თამარ მეფის ღრე

1

სამეფოს შინაური გამგებლობა. სამართალი, ეპრობა.



საქართველოს შინაური საქმეთა გამგებლობის წესებში ბევრი არაფერი შეცვლილა და წინანდებურად რჩებოდა. ხოლო მხოლოდ მტკ ურადლებას აქცევდნენ ხალხის კეთილდღეობისა და ქვეყნის მოშენების საკითხს. უდიდესი საქმე რომელიც და-



აწესა თამარ მეფემ ქვეშევრდომთათვის იყო მოწესრიგება ღარიბ-გლახაკთა საკითხისა: ჯერ ტახტზე ასვლისას გახსნა საქურქლენი და გასცა წყალობა „და იხსნა მოვალენი ვალთაგან და მისცა ობოლთა და ქვრივთა კმასაყოფელი მათი“ მაგრამ თამარს ესმოდა, რომ ასეთი შემთხვევითი წყალობანი გლახაკთა დახმარების საკითხს ვერ გადასწყვეტდა და ამიტომ როგორც მოგვითხრობს მათიანე, შემდეგ ზომას მიმართა.

„გლახაკთათვის განაჩინეს სარწმუნონი ზედამდგომელნი და ყოველსა სამეფოსსა მისსა შემოსავალნი, რაცა იყო, შინათ და გარეთ ყოველისა ნაათალი გლახაკთ მიეცემოდა და უკლებლად ერთისა ქრთილისა მარცვალამდეცა და იმას ყოველად არა გონებდა ქველს საქმედ მითვალვად წინაშე ღვთისა, რამეთუ რაჟამს შოიკალის მარტოებით ყოფად მყის აღიღის სასთველი და საკერავი და ნაშრომსა მას თვისსა ხელთასა ხუცესთა და გლახაკთა განუყოფენ თავისითა ხელითა“

როგორც ვხედავთ ეს საკითხი თამარ მეფეს სახელმწიფო სერიოზულ საკითხად მიაჩნია და არა მხოლოდ საქველმოქმედო მნიშვნელობას აწერს მას. ქველმოქმედება მისი აზრით არის ის რაც შეიძლება აღამიანმა საკუთარ ძალთა მონაგარით გასწიოს. ამ მოსაზრებით ის ქაოვდა, ართავდა და კერვიდა და აქედან მოპოებულ ფულს არიგებდა. სამეფოს შემოსავლის ნაათალის გლახაკთა გადადებასთან ერთად ვამოსცა ბრძანება და საქართველოს სხვა და სხვა კუთხეებში ააშენებინა სასტუმროები და ფუნდუქნი ანუ თავშესაფარნი.

ხოლო ვახუშტის გეოგრაფიიდან ჩვენ ვიცით, რომ ასეთივე ფუნდუქი არსებობდა კოჯორის მაზლობლად, რისთვისაც ამ ალაგს ეწოდა სამადლო. ამ თანხის გლახაკთათვის დასარიგებლად თამარ მეფემ დააწესა სარწმუნო ზედამდგომელნი.

ქვეყნის კეთილდღეობა ისეთ ქვეყნებში, როგორიც არის საქართველო თხოულობს მორწყვის საქმის მოწესრიგებას, რადგანაც წინააღმდეგ შემთხვევაში არავითარი მოსავალი არ



მოვა. თამარ მეფის დროს ამ საქმესაც ყურადღებით ბოდნენ და მისი არხები ზოგი ამომშრალ - გაფუჭებული და ზოგი მომკმედი ახლაც არსებობენ.

მეტია თქმა, რომ ციხე ქალაქთა აშენებაც თამარის დროს დიდად გავრცელებული იყო და ესეც სამეფოს სააშშენებლო საქმეს უნდა მიეწეროს.

ღვთის მოყვარული და ღმობიერი თამარი ვერ იტანდა უდიდეს უსამართლობას რომელიც გააჩინეს ადამიანებმა ის ვერ ეთვისებოდა ადამიანის სიკვდილით დასჯას, მან უარყო აგრეთვე ბარბაროსული სასჯელები ასოთა წარკვეთისა. უდიდესი სასჯელი მის დროს იყო ექსორია. რადგანაც ყველამ იცოდა მისი ღმობიერება, ამიტომ როდესაც დაიჭირეს გუზან აბულასანის ძე და მიგვარეს დავით სოსლანს, მან ვასცა ბრძანება, სანამ თამარ მეფეს განმდგომილის დაქვრას გააგებინებდნენ, მისთვის თვალები დაეწვათ. ესე, გუზან, ამბობს მატიანე, შეიპყრეს და მიიყვანეს დავით მეფისა წინაშე ხოლო მან უწყოდა დიდი შეწყალობა თამარისი, ამისთვის მისთა შეკითხვამდის თვალები დასწვა“. იმ რას ამბობს აღტაცებული ისტორიკოსი თამარ მეფის 12 წლის მეფობის შემდგომ: „ვითარმელ ამის განგებისა ათორმეტსა წელიწადსა შინა არცა თუ ტანჯგანაგი“) უბრძანა ვისსადმე დაკრვად, რამეთუ შორს იყო ყოვლისა მოსისხლეობისა და თვალთა დაბნელებისა და ასოთა მიღებისა, რომელითა უძრწოდა შიშნულად ყოველი საბრძანებელი მისი მშვიდი იყო და მყუდრო და მშვიდობისა მყოფელი. ამისთვის იშვებს მშვიდობით სიტყვისაებრ საწინასწარმეტყველოსა; მშვიდთა დაიმკვიდრონ ქვეყანა“. „მის დროს“ განაგრძობს მატიანე, „არ იყო მიმძღვრებელი და მძღვრებელი“) არცა მტაცებელი, არცა შეკობრე და მზვარაკი. იტყუდა, ვითარ მე ვარ მამა ობოლთა და მსაჯული ქვრივთა და მოწყალეობისათვის გეყავნ დადიანი ვარდან, ბოცოსძე ბოცო და ამათნი მიმდგომნი დიდებულნი, რომელნი ჩანან შეწყალებულნი, ვინათგან უდიდესნი საქმენი წინამდებობენ“.

*) წილები.

**) მიავრელი და ჩავრელი.

საქართველოს სამეფოს კავშირი სხვა და სხვა სამეფოებთან ბერების, ლაშქრობისა თუ ძლენობის საშველებით რასაკერიველია გამოიწვევდა ვაჭრობის განვითარებას. მართლაც ძალიან ხშირად ვხვდებით სხვა და სხვა ქვეყნის ნაშრომს და, სხვათა შორის, ალექსანდრიიდან მოტანილ მატყლსაც კი. ცხადია თუ ასეთი სიშორიდგან მატყლი მოჰქონდათ სხვა რამესაც ჩმოიტანდნენ. მეტად განვითარებული იყო ალემ-მიცემობა თვით საქართველოშიაც, არსებობდა ბანკები და სააქციონერო საზოგადოებანი რომლებიც დიდ ფულს ატრიალებდნენ.

VI

კულტურული მდგომარეობა, მწერლობა, მეცნიერება და ხელოვნება.

სამეფოს ძლიერებისა და ეკონომიურ ზრდასთან ერთად, იზრდება გონებრივი განვითარება და ესთეტიური სიფაქიზე ქართველთა და თამარ მეფის ხანას შეხვდა ხანა აყვავებისა საქართველოს გონებრივ ესთეტიურ ცხოვრებისა. სამწუხაროდ აყვავების ხანას არ დასცალდა ნაყოფის გამოღება და ქართველთა სულიერი საუნჯე, რომელიც გროვდებოდა დავით აღმაშენებლის დროითგან თამარის შემდგომ ძალიან მალე გაიფანტა, განცალკევდა, დაღარიბდა და დამახინჯდა. მაგრამ ის ნაშრომნიც კი რომლებიც მათი ახლანდელი სახით ავტორებმა შეიძლება ვერც კი იცნან, მაინც იმდენად დიდია, რომ მათი მზგავსი ქართველ ერს ჯერაც არ შეუქმნია რა, ისინი იტაცებენ ადამიანის გონებას თავის აზრებით და ენის სილამაზით. თამარის დრომ მოგვცა ჩვენ უკვდავნი, სანამ არსებობს საქართველო, შოთა, ჩაბრუხაძე, მთარგმნელი ს. თმოგველი და სხვანი. რომელი მწერალიც არ უნდა აიღო, ყოველ მათგანში ნათლად სჩან განვითარება მეცნიერული, გონებრივი და გემოვნების. საქართველო თავისი მდებარეობის გამო ყოველთვის იყო ბერძენ-სპარსელების და არაბების სასპერეზო და მისთვის იბრძოდნენ ეს მძლავრი სამეფოები და საქართველოც იძულებული იყო

ხან ერთს დამორჩილებოდა და ხან მეორეს. რასაკვირველია. პოლიტიკურ გავლენას თან გონებრივი გავლენა მოჰყვებოდა. და მართლაც ამ მხრივაც საქართველო თითქოს ბერძნულ-ქრისტიანულ და სპარსულ-მუსულმანური მწერლობის საასპარეზო გახდა, ხოლო რამდენად მავნებელი და დამატვეითებელი იყო საქართველოსათვის პოლიტიკური გავლენა, იმდენადვე სასარგებლო გამოდგა გავლენა გონებრივი. სწორედ ამ ორი მიმართულების გავლენის ქვეშ წარმოშობა ქართველის ნიქმა ის ხელი-ხელ საგოგმანები მარგალიტები, რომლებშიც ქართველები ეხლაც თავისი ნიჭის საუკეთესო გამოხატულებას ჰპოებენ. ამ თხზულებებში ადამიანი ხედავს რომ მისი დამწერი შხატარის გარდა იყო მეცნიერიც და ფილოსოფოსიც. ვეფხის ტყაოსნის შინაარსი, მაგალითად ნათლად გვიხატავს რამდენად მალა მდგარა თვით მწერალი და საზოგადოებაც რომელსაც ის მან მიუძღვნა.

შინაარსის მხრივ ჩაბრუნების ხოტბები მართალია უფრო დაბლა დგანან, მაგრამ ქართული ენის მეცნიერების დედა ბოძი ნიკო მარი უფრო მალა აყენებს მათ, როგორც გამოხატველს თამარის დროის კულტურული და ნაციონალური ინდივიდუალური ცხოვრებისა. მათში, ხოტბებში, ამბობს ის: „ჩვენ გვაქვს ერთად ერთი წყარო საქართველოს მე-XII საუკ. თავისებური კულტურის შესასწავლად. კულტურულ-ისტორიულ მხრით ეს წყარო დიდმნიშვნელოვანია არა მარტო იმ ლიტერატურულ ფაქტების ცნობებით, რომლებაც მხოლოდ მასში არიან, არამედ შთაბეჭდილებით რომელსაც ახდენს ადამიანზე მათი კითხვა, მე-XII საუკ. ქართულ საზოგადოების, რომელის გასართობათაც იწერებოდა ხოტბები, ყოველმხრივი და მეცნიერული განვითარების სასარგებლოდ. ამას გარდა ხოტბებში შენახულია დიდმნიშვნელოვანი ძველი ქართული სახელმწიფოებრივი აზრის განვითარების ისტორიისათვის. ხოტბანი რასაკვირველია იწერებოდნენ თამარ მეფის შესაქებად, მაგრამ ეს ქება გამსჭვალულია ცხოველმყოფელი

პატრიოტიზმით. პატრიოტიზმით არა ტენდენციოზური და წინასწარ მოფიქრებული თვით მწერალისა ან მასთან სოლიდარული პატარა ჯგუფისა. არამედ მთელი ეპოქა რომელშიაც ცხოვრებდა პოეტი წარმოადგენს უმაღლეს განვითარებას ქართულ ნაციონალურ სახელმწიფოებრივ და სამხედრო სიამაყისა და ისიც უნებლიედ იძლევა სურათს აზრთა განწყობილებებისა, საქართველოს მოწინავე საზოგადოებისას, რომელიც ხალხიდან ჩამოშორებულ კასტას არ წარმოადგენდა“.

პატრიოტიზმის ასეთ განვითარებას ხელს უწყობდა აგრეთვე ზედ მიწვევით განვითარება ხელოვნების სხვა დარგებისა. თამარის დროს ცხოვრებდნენ საქართველოს საუკეთესო ოქრომკვედელნი ბექა და ბეშქენ ოპიზარნი. ბექას მშვენიერად ნაქედ ხატს შეუძლია აღტაცებაში მოიყვანოს ადამიანი და უჩვენებს მას რა სიმაღლეზე იდგა ეს ხელობა. თამარის მიერ აშენებული კაბენის მონასტერი სანამ არ დაანგრევდნენ შვენოდა საუცხოვო ჩუქურთმებით. ვარძია ხომ ადამიანს ანცვიფრებს თავის სიდიადით და დიუბუასა და ბაქრაძის სიტყვებით შესამჩნევია თავის მხატვრობითაც. თამარის დროსვე აშენებული არა ნაკლები ნაშთი ხუროთმოძღვრებისა ბეთანია. უკანასკნელ ეკლესიაში შენახულია სრულიად ერთნაირი სურათი თამარ მეფისა, მეფე გიორგისა და ლაშასი.

თამარის ხანა საუკეთესო მაჩვენებელი ქართველი ერის უნარისა და ნიჭისა, საინტერესოა იმ პოლიტიკითაც რომელიც დაიწყო ბაგრატ მე-IV, განავითარა დავით აღმაშენებელმა და დაამთავრა თამარ მეფემ. ეს პოლიტიკა საქართველოს შეერთებისა და აბსოლიუტიზმის*) განვითარებისა, უფრო კარგად შეასრულა ლმობიერმა და დაყვევებამ-შეწყალების პოლიტიკამ თამარისა, ვიდრე ჯაშუშობისა და დაშინების პოლიტიკამ დავით აღმაშენებელისა. ეს კი მოხდა არა იმიტომ, რომ მათი პოლიტიკა ერთი ერთმანერთზე განსხვავდებოდნენ, არა-

*) აბსოლიუტიზმის კონსტრუქციის, ხმელეთი უფლებების კანდიდატურის კონსტრუქციის.

მედ იმიტომ, რომ თვით საზოგადოება დავითის დროს და თამარის დროს დიდად განსხვავდებოდა ერთიმეორისაგან. უფრო განვითარებული და მომწიფებული თამარის დროს, ის ხედავდა სარგებლობას სამეფოს გაერთიანებაში და აბსოლიუტიზმს ემსახურებოდა. საუკეთესო მაგალითს ამ მხრივ წარმოადგენენ უცხო ერის დიდებულნი მხარგმელნი, რომლებიც კარგად ხედავდნენ რომ მათი ქვეყანაც—სომხეთი ბევრად უკეთესად გრძობდა თავს გაერთიანებული საქართველოს ფარგლებში, ვიდრე ცალკე სამეფოდ და ეს რწმენა მათ ხდიდა აბსოლიუტიზმის საუკეთესო მსახურებად, ამიტომაც მოხდა რომ აზნაურთა სურვილი: მართვა-გამგეობის ხელში ჩაგდება მეფის უფლება შეესუსტებინათ არ გამართლდა, რადგანაც თვით ის დიდებულნი რომელთაც მეფის უფლება უნდა შეესუსტებინათ გახდნენ სამეფო აბსოლიუტიზმის საუკეთესო მსახურებად და დედაბოძებად გაუხდნენ მას. ჩვენ რასაკვირველია ვგმობთ აბსოლიუტიზმს ეხლანდელ დროში, როგორც დამჩაგვრელს აღამიანის თავისუფლებისა, მაგრამ სულ სხვა მნიშვნელობა ჰქონდა მას თამარის დროს. აბსოლიუტიზმმა შექრა და შეაკავშირა საქართველოს დიდებულნი, ალაგმა ისინი და ხალხის ნიქს მისცა საშვალება თავისი უნარი გამოეჩინა და ქვეყნიერობის ისტორიაში ქართველი ერი უმაღლეს საფეხურზე დაეყენებია; და ახლაც 700 წლის შემდგომ ქართველ ერს კარგად ახსოვს ეს ოქროს ხანა,—ქართული ნიქის მშვენიერი ყვავილი და ახალი ყვავილების გამოცემის ლოდინში ეთაყვანება წარსულს, ეთაყვანება თამარ მეფეს, როგორც გამომატველს ერის ცხოვრების საუკეთესო ხანისა, ბევრმა ქართველმა არც კი იცის, რომ თამარი გელათს არის დამარბული, მაგრამ ყველამ იცის ვინ არის თამარი და რა არის მისი ხანა ქართველის ეროვნულ თვითშემეცნებაში. ეს ხანა დიდებული ერისათვის კიდევ უფრო დიდებული და საინტერესოა ქართველი ქალისათვის, რადგანაც არც ერთ საუკუნეში გარდა ამ ხანისა ქარ-

თველი ქალი არ გამოხულა სამეფო სარბიელზე უფრო საპატიოდ და ღირსეულად.

გარდაიცვალა თამარ მეფე და მასთან ერთად ნელ-ნელა დასცივიდა ყველა ყვავილი საქართველოს გაფურჩქენილ ხეს. განგება თითქოს უცდიდა თამარის სიკვდილს, რომ საამაყო და სათაყვანებელ მზრუნველთან ერთად გაენადგურებინა ყველაფერი რაც მან დასთესა. თამარ მეფის შემდგომ არა ერთმა მეფემ და მოღვაწემ შეაღია მთელი სიცოცხლე და უნარი საქართველოს განახლების საქმეს, მაგრამ ბედი ჯერ კიდევ არ სწყალობდა ქართველებს და მათი ცდა უნაყოფოდ რჩებოდა. შვიდი საუკუნეა უქადაგებენ ქართველებს რომ დადგება დრო, დაჰბერაეს სანეტარო სიო და საქართველო ისევ აღდგებაო, და ახლა საუკეთესო დრო დადგა, შემბორკველი ძალები რუსეთის მეფობრივი უფლებებისა დაემხო და საქართველოს ფართე გზა გაეხსნა მომავალი ცხოვრების მოსაწყობათ. მომავალი გვიჩვენებს შესძლებს თუ არა საქართველო ისეთივე აღდგომის დაქერას კაცობრიობის შორის, როგორც ექირა მას მე-XII საუკუნეში.

ი. ანთაძე.

(დასასრული).





შ ა რ ა დ ე ბ ი

(წარმოდგენილი პ. ნიორაძის მიერ)

I


ღირიბი კაცის სარჩოსა
თავი და ბოლო წაართვი,
ღარჩენილსა კითხვა ღართე,
შემდეგ კავშირი მიართვი;
სულ კარგი სათამაშოა,
ჰკუა თხელსა ვერ მივართვი.

(ახსნა—ქადრაკი)

II

მის პირველი—ყველაფერს აქვს,
რაც კი სჩანს ან იფიქრება,
მას ბოლო ასო არ უნდა,
შირადაში იგი ჰქრება.
მეორე სიტყვის ხმარობენ,
როცა ხილი ძალზე სტკებება
(ჩვენთვის მის ბოლო ხმიანად
ერთის მაგიერად სხვა სდგება)
საერთოდ იმას განაგებს
რისგანაც თვითონ შესდგება.

(ახსნა—სახელმწიფო)





რედაქციისათვის.

ამ ნომრით რედაქცია ასრულებს გასულ საგამომცემლო წელს. მრავალ დაბრკოლებათა გამო, მან ვერ შესძლო უკლებლივ და თავის დროზე მიეწოდებია თავის მკითხველები-სათვის გასული წლის „ნაკადულის“ ნომრები. მაგრამ რედაქცია პირნათლად სდგას მაინც მათ წინაშე, რადგანაც 1918 წ. განმავლობაში გამოცემული ნომრები გაცილებით მეტი დაუჯდა მას, ვინემ თორმეტი მანეთი; მხოლოდ სამწუხაროდ ის მიგვაჩნია, რომ ჩვენს მკითხველებს მოაკლდა სიამოვნება და გონებრივი საზრდო, რასაც მას, „ნაკადული“ აძლევდა. რედაქციას წრეულს იმედი აქვს საგამომცემლო პირობების გასულ წელთან შედარებით გაუმჯობესების გამო, რომ მიმდინარე წლის განმავლობაში უკლებლივ და თავის დროზე მიაწვდის თავის მკითხველებს „ნაკადულის“ ნომრებს.

„ნაკადულის“ რედაქცია.

მიიღება ხელის მოწერა 1919 წლისათვის.

დასურათებული საყმაწვილო უზრნალი საქართველოს
საქართველოს

წელიწადი „**ნაკადული**“ წელიწადი მეთუთხმეტე. „**ნაკადული**“ მეთუთხმეტე.

უზრნალი გამოვა ჩვეულებრივი პროგრამით
საგანგებოდ მოწვეულ სარედაქციო კომისიის ხელმძღვანელობით
მცირე-წლოვანთა და მოზრდილთათვის.

ეურნალი გამოვა თვეში ერთჯელ მცირე-წლოვანთათვის,
48 გვერდი და მოზრდილთათვის 64 გვერდი.

ფასი ეურნალისა: წლიურად ორივე გამოცემა—55 მან. ნახე-
ვარი წლით—30 მან. ცალ-ცალკე: მცირე წლოვანთათვის—30 მან,
მოზრდილთათვის—30 მან. ფოსტის ადრესი: თბილისი „ნაკადულის“
რედაქცია. ტელეფ. 7—51.

რედაქციაში არის გახული წლის კომპლექტები. **ხელის მოწერა მიიღება**

თბილისში— „ნაკადულის“ რედაქციაში, ზუბალაშვილის სახლი, გოლოვინის პროსპ. შემოსასვლელი—დავითის ქუჩიდან, № 2., წერაკითხვის გამავრცელებელ საზოგადოების წიგნის მაღაზიაში, სასახლის ქუჩა; **ქუთაისში**—ისიდორე კვიციანიძისთან, მ. ყაუხჩიშვილთან და თ. მთავრიშვილთან. **ფოთში**—ლუდმილე მეგრელიძისთან. **ბათუმში**—ტროფიმ ინასარიძისთან—ფოსტაში, **თელავში**—ვანო პაატაშვილთან. **გორში**—ქეთევან ჯავახიშვილთან ღ ნინო ლომოურთან. **ჭიათურაში**—ი. წერეთელთან. **ხონში**—მ. ი. კავკანიძისთან. **ოზურგეთში**—სალომე ხუნდაძისთან, **ლანჩხუთში**—მასწავლებელ ჯუღელთან.

რედაქტორი ნინო ნაკაშიძე
გამომცემელი შ. პავლე იოსების-ძე თუშანიშვილი.